

唐書合鈔

唐書卷第六十五

志四十一

職官二

太師太傅太保各一員謂之三師並正一品

原注後漢初太傅置

府僚至周隋三師不置府僚初拜於尚書省上隋煬帝廢三師之官武德復置一如隋制

三師訓導之官天子所師法大抵無所統職然非道

德崇重則不居其位無其人則闕之

太尉司徒司空各一員謂之三公並正一品

原注魏晉至北齊三

公置府僚隋初亦置府僚尋省府僚初拜於尚書省上唐因之武德初太宗爲之其後親王拜三公皆不視事

祭祀則攝者行也

三公論道之官也蓋以佐天子理陰陽平邦國無所

不統故不以一職名其官大祭祀則太尉亞獻司徒

奉俎司空埽除

尚書都省

原注龍朔二年改爲中臺光宅元年改爲文昌臺神龍復初

尚書省領二

十四司

六尚書各分領四司

尚書令一員正二品

原注武德中太宗爲之自是闕

而不置

左右僕射各一員從二品左丞一員正四品上右

丞一員正四品下

原注永昌元年升爲從三品如意元年復

左右司郎中各

一員從五品上

原注隋置武德初省貞觀初復置

左右司員外郎各一

員從六品上

原注永昌元年置神龍初省後復置

都事六人從七品上主

事六人從八品下

令史十八人書令史三十六人亭長六人掌固十四人

尚書令總領百官儀刑端揆其屬有六尚書一曰吏

部二曰戶部三曰禮部四曰兵部五曰刑部六曰工

部凡庶務皆會而決之

六尚書兵部吏部爲前行刑部戶部爲中行工部禮部爲

後行行總四司以本行爲頭司餘爲子司

左右僕射掌統理六官綱紀庶務以貳令之職自不置令僕射總判省事御史糾劾不當兼得彈之

左丞掌管轄諸司糾正省內勾吏部戶部禮部十二司通判都省事若右丞闕則併行之右丞管兵部刑部工部十二司若左丞闕右丞兼知其事御史有糾劾不當兼得彈之

左司郎中副左丞所管諸司事省署鈔目勘稽失知

省內宿直之事若右司郎中闕則併行之

左右司郎中員外郎各掌副十有二司之事以舉正稽違署符目焉

凡都省掌舉諸司之綱紀與百僚之程式以正邦理

以宣邦教凡上之所以迨下其制有六曰制敕冊令

教符原注天子曰制曰敕曰冊皇太子曰令親王公主曰教尚書省下於州州下縣縣下鄉皆曰符

凡下之所以達上其制亦有六曰表狀牋啟辭牒原注

表上於天子其近臣亦爲狀牋啟上皇太子然於其長亦爲之非公文所施行品已上公文皆曰牒庶人

言曰諸司自相質問其義有三關刺移原注闕謂關

辭也刺舉之移謂移其事於他司凡內外百司所受之事

移則通判之官皆連署也

凡內外百司所受之事

皆印其發日爲之程限一日受二日報凡尚書省施行制敕

案成則給程以鈔之若急速者不出其日若諸州計

奏達於京師量事之大小與多少以爲之節凡京師

諸司有符移關牒下諸州者必由於都省以遣之凡天

下大事不決者皆上尚書省凡文案旣成勾司行朱訖皆書其上

端記年月日納諸庫凡施行公文應印者監印之官

考其事目無差然後印之必書於厯每月終納諸庫

凡尚書省官每日一人宿直都司執直簿轉以爲次

凡內外百僚日出而視事旣午而退有事則直官省

之其務繁不在此例凡天下制敕計奏之數省符宣

告之節率以歲終爲斷京師諸司皆以四月一日納於都省其天下諸州則本司推校以授勾官勾官審之連署封印附計帳使納於都省常以六月一日都事集諸司令史對覆若有隱漏不同皆附於考課焉都事掌受事發辰察稽失監印給紙筆

從新書增

凡令史掌案文簿亭長掌固檢校省門戶倉庫廳事

陳設之事

初有駟驛百人掌乘傳送符後廢

吏部尚書一員正三品侍郎二員正四品上

原注隋大業三年尚

書六曹各置侍郎一人以貳尚書之職並正四品國家定令諸曹侍郎降爲正四品下唯吏部侍郎爲正四品上總章元年吏部兵郎中二員從五品上員外郎二員部各增置侍郎一員

從六品上主事四人從九品上

令史三十人書令史六十人制書令史六十人

甲庫令史十二人亭長八人掌固十二人

司封郎中一員從五品上

原注隋曰主爵

郎武德因之龍朔二年改爲司封大夫光宅改司封郎中

員外郎一員從六品上主

事二人從九品上

令史四人書令史九人掌固四人

司勳郎中一員從

五品上員外郎二員從六品上主事四人從九品上

令史

三十三人書令史六十七人掌固四人

考功郎中一員從五品上員外郎

一員從六品上主事三人從八品下

令史十三人書令史二十五

人掌固四人

吏部尚書侍郎之職掌天下官吏選授勲封考課之

政令其屬有四一曰吏部二曰司封三曰司勳四曰

考功總其職務而行其制命凡中外百司之事由於所屬皆質正焉凡選授之制每歲集於孟冬去王城

五百里之內以上旬千里之內以中甸千里之外以

下旬尚書侍郎分三銓原注尚書為尚書銓侍郎二人分為中銓東銓也凡

擇人以四才校功以三實原注四才謂身言書判其優長者有可取焉三實謂

德行才用勞効德均以才才均較之優劣而定其留

放所以正權衡明與奪抑貪昌進賢能然後據其官

資量其注擬原注五品已上以名上中書門下聽制授其官六品已下量資任定其才職頗

高可擢為拾遺補闕監察御史其有歷職清要考第

者亦以名送中書門下聽敕授其有歷職清要考第頗深者得隔品授之不然即否凡出身非清流者不

注清資官凡注官若官資未相當及以爲非便者聽
至三注凡伎術之官皆本司定送吏部附甲凡同司
聯事勾檢之官皆不得注大功已上親凡皇親諸親
及軍功兼注員外郎凡注擬必先具官階團甲送門
下以聞原注注官階高擬卑曰行階卑擬高曰守三
銓注擬訖皆當銓團甲過左右僕射若中銓
東銓則過尚書訖乃上門下省給事中讀黃門侍郎
省侍中審然後進甲以聞聽旨授而施行焉若左右
僕射門下批官不當者別凡大選終於季春之月
改注亦有重職而上者也原注
若選人有身在軍旅則軍中試書判封送吏部亦有
春中下解而後集謂之春選若優勞人有敕則有處
分及卽與官者並聽非所以定九流之品格補萬方
時選一百日內注擬之

之闕政官人之道備焉

郎中一人掌考天下文吏之班秩階品凡叙階二十有九品在都序自一品至九品品有上下凡散官四品已下九品已上並於吏部當番上下

不上者歲輪資錢三品以

上六百六品以下一千水旱蟲霜減半資有文藝樂京上者每州七人六十不樂簡選者罷輪勲官亦如之以征鎮功得護軍以上者納資減三之一其應當番四十五日若都省

須人送符諸司須人者並兵部吏部散官上經兩番已上聽簡入選不第者依番多不過五六也凡敘階之法有以封爵有以親戚有以勲庸有以資蔭有以秀孝有以勞考有除免而復敘者皆循法以申之無或枉冒凡應入三品五品者皆待別制而進之不然

則否凡文武百僚之班序官同者先爵爵同者先齒

凡京司有常參者

原注謂五品已上職事官八品已上供奉官員外郎監察御史太常

博士供奉官

原注兩省自侍中中書令已下盡名供奉官

諸司長官清望官

四品已下八品已上清官每日以六品已上清官兩

人待制於衙

原注供奉官宿衛官不在此例

凡授四品已下清望官

才職相當不應退讓凡職事官應觀省及移疾不得

過程年七十已上應致仕若齒力未衰亦聽釐務凡

官人身及同居大功已上親自執工商家專其業及

風疾使酒皆不得入仕凡內外官有清白著聞應以

名薦則中書門下改授五品已上量加升進六品已

下字誤付吏部卽量等第遷轉若第二第三等人五品

已上改日稍優之六品已下秩滿聽選不在放限其

嶺南黔中三年一置選補使號爲南選凡天下官吏

各有常員凡諸司置直皆有定數原注諸司諸色有品直官內外

官吏則有假寧之節行李之命簿書景迹功賞殿最

具員皆與員外郎分掌之

郎中一人掌小銓亦分爲九品通謂之行署以其在

九流之外故謂之流外銓亦謂之小選其校試銓注

與流內銓畧同其吏部兵部禮部考功都省御史臺

中書門下謂之前八司其餘則曰後行凡擇流外取

工書計兼頗曉時務

原注三事中有一優長則在敘限

每經三考轉

選量其才能而進之不則從舊任

原注小銓舊委郎中專知開元二十

五年敕銓試訖留放皆尚書侍郎定之

員外郎一人掌判南曹

原注曹在選曹之南故謂之南曹

每歲選人

有解狀簿書資歷考課必由之以覈其實乃上三銓

其三銓進甲則署焉

員外郎一人掌判曹務凡預太廟齋郎帖試如貢舉

之制

司封郎中員外郎之職掌國之封爵凡有九等一曰

王正一品食邑一萬戶二曰嗣王郡王從一品食邑

五千戶三曰國公從一品食邑三千戶四曰郡公正

二品食邑二千戶五曰縣公從二品食邑一千五百

戶六曰縣侯從三品食邑一千戶七曰縣伯正四品

食邑七百戶八曰縣子正五品食邑五百戶九曰縣

男從五品食邑三百戶

凡封戶三丁以上為率歲租三之一入於朝廷食實封者

得真戶分食諸州皇后諸王公主食邑皆有課戶

凡名山大川及畿內諸縣

皆不以封至郡公有餘爵聽迴授子孫其國公皆特

封

皇兄弟皇子皆封國為親王皇太子子為郡王親王之子承嫡者為嗣王諸子為郡公以恩進者封

郡王襲郡王嗣王者封國公

凡天下觀有定數每觀立三綱以道

德高者充凡三元諸齋日修金錄明真等齋凡道士

女道士簿籍三年一造凡外命婦之制皇之姑封大

長公主皇姊妹封長公主皇女封公主皆視正一品

皇太子之女封郡主視從一品王之女封縣主視正

二品

新書從二品

王母妻爲妃一品及國公母妻爲國夫

人三品已上母妻爲郡夫人四品母妻爲郡君五品

若勲官三品有封者母妻爲縣君散官並司職事勲

官四品有封者母妻爲鄉君

凡諸王公主外戚之家卜視占相不入門王妃

公主郡縣主族居有子者不再嫁諸蕃三品以上母妻授封以制流外伎術官不封母妻其母邑

號皆加太字各視其夫子之品若兩有官爵者從其

高

凡王公十五以上預朝集宗親女婦諸王長女月二參

若內命婦一品之母

爲正四品郡君二品之母爲從四品郡君三品四品之母並爲正五品縣君凡婦人不因夫及子而別加邑號夫人云某品夫人郡君爲某品郡君縣君鄉君亦然凡庶子有五品已上官皆封嫡母無嫡母封所生母凡二王後夫人職事五品已上散官三品已上王及國公母妻朝參各視其夫及子之禮凡親王孺人二人視正五品媵十人視正六品嗣王郡王及一品媵十人視從六品二品媵八人視正七品三品及國公媵六人視從七品四品媵四人視正八品五品媵三人視從八品降此外皆爲妾

凡置媵上共數補以告身散官三品

以上皆
置廢

凡皇家五等親及諸親三等存亡升降皆立

簿書籍每三年一造除附之制並載於宗正寺

司勳郎中員外郎之職掌邦國官人之勳級凡勳十
有二轉爲上柱國比正二品十一轉爲柱國比從二
品十轉爲上護軍比正三品九轉爲護軍比從三品
八轉爲上輕車都尉比正四品七轉爲輕車都尉比
從四品六轉爲上騎都尉比正五品五轉爲騎都
尉比從五品四轉爲驍騎尉比正六品三轉爲飛騎
尉比從六品二轉爲雲騎尉比正七品一轉爲武騎
尉比從七品凡有功效之人合授勳官者皆委之覆

定然後奏擬

戰功則計殺獲之數堅城苦戰功第一

中陣出多擊少曰下陣矢石未交陷堅突衆敵因而敗者曰跳盪殺獲十之四曰上獲十之二曰中獲十之一曰下獲凡酬功之等見任前資常選曰上資文武散官衛官勲官五品以上曰次資五品以上子孫上柱國柱國子勲官六品以下曰下資白丁衛士曰無資跳盪人上資加二階次資下資無資以次降凡上陣上獲五轉中獲四轉下獲三轉第二第三等遞降焉中陣之上獲視上陣之中獲中獲視上陣之下獲下獲兩轉下陣之上獲視中陣之中獲中獲視中陣之下獲下獲一轉破蠻獠上陣上獲比兩番降二轉凡勲官九百人無職任者番上於兵部視遠近爲十二番以強幹者爲番頭宿衛者爲番月上外州分五番主城門倉庫執刀上柱國以下番上四年驍騎尉以下番上五年簡於兵部授散官不第者五品以上復番上四年六品以下五年簡如初再不中者十二年則番上六年八年則番上四年勲至上柱國有餘則授周以上親無者賜物太常音聲人得五品以上勲非征討功不除簿諸州授勲人歲第勲之高

下三月一報戶
部有蠲免必驗

考功郎中員外郎之職掌內外交武官吏之考課凡
應考之官家具錄當年功過行能本司及本州長官
對衆讀議其優劣定爲九等考第各於所由司準額
校定然後送省內外交武官量遠近以程之有差附
朝集使送簿至省每年別敕定京官位望高者二人
其一人校京官考一人校外官考又定給事中中書
舍人各一人其一人監京官考一人監外官考郎中
判京官考員外判外官考其檢覆同者皆以功過上
使京官則集應考之人對讀注定外官對朝集使注

定

故事考簿朱書吏緣爲姦咸通十四年始以墨

凡考課之法有四善一曰

德義有聞二曰清慎明著三曰公平可稱四曰恪勤

匪懈善狀之外有二十七最其一曰獻可替否拾遺

補闕爲近侍之最其二曰銓衡人物擢盡才良爲選

司之最其三曰揚清激濁褒貶必當爲考校之最其

四曰禮制儀式動合經典爲禮官之最其五曰音律

克諧不失節奏爲樂官之最其六曰決斷不滯與奪

合理爲判事之最其七曰都統有方警守無失爲宿

衛之最其八曰兵士調習戎裝充備爲督領之最其

九曰推鞠得情處斷平允爲法官之最其十曰讐校

精審明爲刊定爲校正之最其十一曰承旨敷奏吐
納明敏爲宣納之最其十二曰訓導有方生徒充業
爲學官之最其十三曰賞罰嚴明攻戰必勝爲將帥
之最其十四曰禮義興行肅清所部爲政教之最其
十五曰詳錄典正辭理兼舉爲文史之最其十六曰
訪察精審彈舉必當爲糾正之最其十七曰明於勘
覆稽失無隱爲勾檢之最其十八曰職事修理供承
強濟爲監掌之最其十九曰功課皆充丁匠無怨爲
役使之最其二十曰耕耨以時收穫成課爲屯官之
最其二十一曰謹於蓋藏明於出納爲倉庫之最其

二十二曰推步盈虛究理精密爲厯官之最其二十
三曰占候醫卜効驗居多爲方術之最其二十四曰
譏察有方行旅無壅爲關津之最其二十五曰市廛
不擾姦濫不作爲市司之最其二十六曰牧養肥碩
蕃息滋多爲牧官之最其二十七曰邊境肅清城隍
修理爲鎮防之最一最以上有四善爲上上一最以
上有三善或無最而有四善爲上中一最以上有二
善或無最而有三善爲上下一最以上而有一善或
無最而有二善爲中上一最以上或無最而有一善
爲中中職事粗理善最不聞爲中下愛憎任情處斷

乖理爲下上背公向私職務廢闕爲下中居官諂詐
貪濁有狀爲下下若於善最之外別可加尚及罪雖
成殿情狀可矜雖不成殿而情狀可責者省校之日
皆聽考官臨時量定內外官從見任改爲別官者其
年考從日申校百司量其閒劇諸州據其上下進考
之人皆有定限苟無其功不要充數功過於限亦聽
量進凡考定皆集於尚書省唱第然後奏親王及中書門下京官三品以上都督刺史都護節度觀察使則奏功過狀以覈考行之上下每歲尚書省諸司具州牧刺史縣令殊功異行災蝗祥瑞戶口賦役增減盜賊多少皆上於考司監領之官以能撫養役使者爲功有耗亡者以十分爲率一分爲一殿博士助敎計講授多少爲差凡考中上以上每進一等加祿一季中中守本祿中下以下每退一等奪祿一季

中品以下四考皆中中者進一階一中上考復進一階一上下考進二階計當進而參有下考者以一中上覆一中下以一一上下覆二中下上中以上雖有下考從上第有下下考者解任凡制敕不便有執奏者進其考焉其流外官本司量其行能功過立四等考第而勉進之清謹勤公爲上執事無私爲中不勤其職爲下貪濁有狀爲下下凡親勲翊

衛皆有考第考第之中畧有三等衛主帥如三衛之

考其監門校尉直長如主帥之考品子雜任飛騎皆上中下考有二上

第者加階番考別爲簿以侍郎專掌之凡議謚之法古之通典皆審其

事以爲旌別若死而傳於史官謚於太常則以其行狀質其當否其欲銘於碑者則會百官

議其宜述者以聞報其家

戶部尚書一員正三品

原注隋爲民部尚書貞觀二十三年改爲戶部顯慶元年改爲

度支神龍侍郎二員正四品下郎中二員從五品上員

外郎二員從六品上巡官二人主事四人從九品上史

十七人書令史三十四人計史一人亭長六人掌固十人度支郎中一員從五品上

員外郎一員從六品上主事二人從九品上令史十六人書令史

三十三人計史一人掌固四人金部郎中一員從五品上員外郎一員

從六品上主事三人從九品上令史十人書令史二十一人計史一人掌固四

人倉部郎中二員新書從五品上員外郎一員從六品

上主事三人從九品上令史九人新書十書令史二十人掌固四人

戶部尚書侍郎之職掌天下田戶均輸錢穀之政令

其屬有四一曰戶部二曰度支三曰金部四曰倉部

總其職務而行其制命凡中外百司之事由於所屬
皆質正焉

郎中員外郎之職掌分理戶口井田之事凡天下十
道任土所出爲貢職之差凡天下之州府三百一十
有五而羈縻之州迨八百焉四萬戶已上爲上州二
萬戶已上爲中州不滿爲下州凡三都之縣在內曰
京縣城外曰畿又望縣有八十五焉其餘則六千戶
以上爲上縣二千戶已上爲中縣一千戶以上爲中
下縣不滿一千戶皆爲下縣凡天下之戶八百一萬
八千七百一十口四千六百二十八萬五千一百五

十一百戶爲里五里爲鄉兩京及州縣之郭內分爲坊郊外爲村里及坊村皆有正以司督察四家爲鄰五鄰爲保保有長以相禁約凡男女始生爲黃四歲爲小十六爲中二十有一爲丁六十爲老每一歲一造計帳三年一造戶籍縣以籍成於州州成於省戶部總而領焉凡天下之戶量其資定爲九等每定戶以仲年造籍以季年州縣之籍恒留五比省籍留九比凡戶之兩貫者先從邊州爲定次從關內次從軍府州若住者各從其先貫焉樂住之制居狹鄉者聽其從寬居遠者聽其從近居輕役之地者聽其從重

辨天下之四人使各專其業凡習學文武者爲士肆力耕桑者爲農巧作器用者爲工屠沽興販者爲商工商之家不得預於士食祿之人不得奪下人之利凡天下之田五尺爲步步二百有四十爲畝畝百爲頃度其肥瘠寬狹以居其人凡給田之制有差園宅之地亦如之凡給口分田皆從便近居城之人本縣無田者則隔縣給授凡應收授之田皆起十月畢十二月凡授田先課後不課先貧後富先多後少凡州縣界內所部受田悉足者爲寬鄉不足者爲狹鄉凡官人及勲授永業田凡天下諸州有公廨田凡諸州

及都護府官人有職分田凡賦人之制有四一曰租
二曰調三曰役四曰課戶每丁租粟二石其調隨鄉
土所產綾絹絁各二丈布加五分之一輪綾絹者綿
三兩輪布者麻三斤皆書印焉凡丁歲役二旬無事
則收其庸每日三尺有事而加役者旬有五日免調
三旬則租調俱免凡庸調之物仲秋斂之季秋發於
州租則準州土收穫早晚量事而斂之仲冬起輸孟
春而納畢本州納者季冬而畢其後以諸行郎官判
錢穀而戶部度支郎
官失其職矣會昌二年著
令以本行郎官分判錢穀凡諸國蕃胡內附者亦定
爲九等凡嶺南諸州稅米及天下諸州稅錢各有準

常凡丁戶皆有優復蠲免之制若孝子順孫義夫節婦志行聞於鄉閭者州縣申省奏聞而表其門閭同籍悉免課役有精誠致應者則加優賞焉凡京師文武職事官皆有防閤凡州縣官僚皆有白直凡州縣官及在外監官皆有執衣凡諸親王府屬並給士力具品數如白直凡有功之臣賜實封者皆以課戶充凡食封皆傳於子孫凡庶人年八十及篤疾給侍丁一人九十給二人百歲三人凡天下朝集使皆以十月二十五日至京師十一月一日戶部引見訖於尚書省與羣官禮見然後集於考堂應考績之事元日

陳其貢篚於殿廷凡京都諸縣令每季一朝

度支郎中員外郎之職掌判天下租賦多少之數物產豐約之宜水陸道途之利每歲計其所出而度其所用轉運徵斂送納皆準程而節其遲速凡和糴和市皆量其貴賤均天下之貨以利於人凡金銀寶貨綾羅之屬皆折庸調以造凡天下舟車水陸載運皆具爲脚直輕重貴賤平易險澀而爲之制凡天下邊軍有支度使以計軍資糧仗之用每歲所費皆申度支會計以長行旨爲準

金部郎中員外郎之職掌判天下庫藏錢帛出納之

事頒其節制而司其簿領凡度以北方秬黍中者一
黍之廣爲分十分爲寸十寸爲尺一尺二寸爲大尺
十尺爲丈凡量以秬黍中者容一千二百爲籩二籩
爲合十合爲升十升爲斗三斗爲大斗十斗爲斛凡
權衡以秬黍中者百黍之重爲銖二十四銖爲兩三
兩爲大兩十六兩爲斤凡積秬黍爲度量權衡調鍾
律測晷景合湯藥及冠冕之制用之内外官私悉用
大者凡庫藏出納皆行文牒季終會之若承命出納
則於中書門下省復而行之百司應請月俸符牒到
所由皆遞覆而行之乃置木契與應出物之司相合

凡官私互市物數有制凡縑帛之類有長短廣狹端正屯綬之差凡賜十段其率絹三正布三端綿四屯若雜綵十段則絲布二正紬二正綾二正縵四正若賜蕃客錦綵率十段則錦一張綾二正縵三正綿四屯凡遣使覆囚則給時服若諸使經二年不還亦如之凡時服稱一具者全給之一副者減給之正冬之會稱束帛有差者皆賜絹五品已上五正六品已下三正命婦視其夫子

倉部郎中員外郎之職掌判天下倉儲受納租稅出給祿廩之事凡中外文武官品秩有差歲再給之乃

置木契一百枚以與出給之司合諸司官人及諸色人應給食者皆給米凡致仕之官五品已上及解官充侍者各給半祿卽遷官者通計前祿以充後數凡都已東租納含嘉倉自含嘉轉運以實京太倉自洛至陝爲陸運自陝至京爲水運置使以監充之凡王公已下每歲田苗皆有簿書凡義倉所以備歲不足常平倉所以均貴賤也

禮部尚書一員正三品侍郎一員正四品下郎中一員

原注隋曰儀曹郎武德改禮部郎中

從五品上員外郎一員從六品上主

事二人從八品下

令史五人書令史十一人亭長六人掌固八人祠部郎中一

員從五品上員外郎一員從六品上主事二人從九品

上

令史五人
新唐十亭長六人掌固八人

膳部郎中一員從五品

上員外郎一員從六品上主事二人從九品上

令史四人
書令史九

人掌固

主客郎中一員

原注隋曰司蕃郎
武德改主客郎中

從五品上員外

郎一員從六品上主事一人從九品上

令史四人
書令史九人掌固四人

禮部尚書侍郎之職掌天下禮儀祭享貢舉之政令

其屬有四一曰禮部二曰祠部三曰膳部四曰主客

總其職務而行其制命凡中外百司之事由於所屬

皆質正焉凡舉試之制每歲仲冬率與計偕其科有

六一曰秀才

原注試方畧策五條此科
取人稍峻貞觀已後遂絕

二曰明經三

曰進士四曰明法五曰書六曰算凡此六科求人之
本必取精究理實而升爲第其有博綜兼學須加甄
獎不得限以常科其宏文崇文館學生雖同明經進
士以其資蔭全高試取粗通文義其郊社齋郎簡試
如太廟齋郎其國子監大成二十員取明經及第人
聰明灼然者試日誦千言并口試仍策所習業十條
通七然後補充各授散官依舊令於學內習業以通
四經爲限

郎中員外郎之職掌貳尚書侍郎舉其儀制而辨其
名數凡五禮之儀一百五十有二一曰吉禮其儀五

十有五二曰賓禮其儀有六三曰軍禮其儀二十有

三四曰嘉禮其儀五十五曰凶禮其儀一十有八凡

元日大陳設於含元殿服充冕臨軒展宮縣之樂陳

歷代寶玉輿輅備黃麾仗二王後及百官朝集使皇

親並朝服陪位

凡齊衰心喪已上奪情從職及周喪未練大功未葬皆不預宴

大會

之日陳設如初凡冬至大陳設如元正之儀其異者

無諸州表奏祥瑞貢獻

皇帝巡幸兩京文武職事官五品以上月朔以表參起居

近州刺史遣使一參留守月遣使起居北都則四時遣使起居諸司奏大事者前期三日具狀長官躬署

對仗伏奏仗下中書門下讀讀河南太原府父老每歲上表願駕幸遣使以聞駕在東都則京兆府亦如

之凡元正冬至大會之明日百官朝集使等皆詣東

宮慶賀凡千秋節御樓設九部之樂百官袴褶陪位

凡京司文武職事九品已上每朔望朝參五品已上

及供奉官員外郎監察御史太常博士每日參凡朝晚入

失儀御史錄名奪俸三奪者奏彈凡諸蕃國來朝皆設宮縣之樂及

黃麾仗若蕃國使則減黃麾之半凡出蕃冊授帛凡贈者給衣冠

冊皇后太子太子妃諸王諸王妃公主並臨軒冊命

陳設如冬正之儀訖皆拜太廟凡祥瑞皆辨其名物

有大瑞上瑞中瑞皆有等差凡景星慶雲為大瑞其

兎為上瑞其名物三十有八蒼烏木雁為中瑞其名

物三十有二嘉禾芝草木連理為下瑞其名物十四
大瑞則百官詣闕奉賀餘瑞凡太陽虧所司預奏其
歲終員外郎以聞有司告廟

日置五鼓五兵於太社而不視事百官各素服守本
司不聽事過時乃罷月蝕則擊鼓於所司若五嶽四
鎮四瀆崩竭皆不視事三日凡二分之月三公巡行
山陵則太常卿爲之副凡百官拜禮各有差致敬之
士若非連屬應敬之官相見或自親戚者各從其私
禮凡樂有五聲八音六律六呂陳四懸之度分二舞
之節以和人倫以調節氣以享鬼神以序賓客凡私
家不得設鍾磬三品已上得備女樂五品女樂不得
過三人居大功已上喪受冊及之官雖有鼓樂從而
不作

戎事則否

凡太廟太社及諸宮殿門東宮及一品已

下諸門施戟有差凡內外百官皆給銅印有魚符之

制

原注並出於門下省

凡服飾尚黃旗幟尚赤天子皇后太子

已下之服

原注事在輿服志也

凡百僚冠笏繖幟珂珮各有差

常服亦如之凡凶服不入公門凡授都督刺史階未

入五品者並聽著緋珮魚離任則停凡文武官赴朝

詣府導從各有差凡職事官薨卒有賻贈柳翼碑碣

各有制度

凡喪二品以上稱薨五品以上稱卒自六品達於庶人稱死皇親三等以上喪舉哀

有司帳具給食諸蕃首領喪則主客鴻臚月奏

祠部郎中員外郎之職掌祠祀享祭天文漏刻國忌

廟諱卜筮醫藥僧尼之事凡祭祀之名有四一曰祀

天神二曰祭地祇三曰享人鬼四曰釋奠於先聖先

師其差有三若昊天上帝皇地祇神州宗廟爲大祀

原注祀天地皆以祖宗配享日月星辰社稷先代帝王岳鎮海瀆

帝社先蠶孔宣父齊太公諸太子廟爲中祀司中司

命風師雨師衆星山林川澤五龍祠等及州縣社稷

釋奠爲小祀珠玉珍寶供祭者不求於市駕部比部歲會牲之死亡輸皮於太府郊祭酒醴

脯醢黍稷果實所司長官封署以供兩京及磧西諸州火祆歲再祀而禁民祈祭大祀皇帝

親祭則太尉爲亞獻光祿卿爲終獻若有司攝事則

太尉爲初獻太常卿爲亞獻凡大祀散齋四日致齋

三日大祀齋官皆於散齋日平明集尚書省受誓誡

中祀散齋三日致齋二日小祀散齋二日致齋一日

皆祀前習禮沐浴並給明衣凡官爵二品已上祠四

廟五品已上祠三廟六品已下達於庶人祭祖禘而

已二王後享廟則給牝牢祭器而完凡國有封禪之

禮則依圓丘方澤之神位凡巡幸路次名山大川聖

告祭凡天下寺有定數每寺立三綱以行業高者充原

諸州寺總五千三百五十八所三千二百三十五所

僧二千一百二十二所尼每寺上座一人寺主一人

都維那凡僧簿三年一造凡別敕設齋應行道並官

給料凡國忌日內教太常兩京大寺各二以散齋僧

尼文武五品已上清官七品已上皆集行香而退天

下州府亦然凡遠忌日雖不廢務然非軍務急切亦

不舉事餘如常式

凡名醫子弟試療病長官泄覆三年有驗者以名聞

膳部郎中員外郎之職掌邦之祭器牲豆酒膳辨其

品數及藏氷食料之事

諸司供奉口味躬餽其輿以遣進胙亦如之非大禮大慶

不獻食不進口味凡羊至厨而乳者釋之長生大齋日尚食進蔬食釋所殺羊爲長生供奉凡獻食進口味不殺犢尚食有狎須別索必覆奏月終而會之凡尚食進食以種取而別嘗之殿中省主膳上食於諸陵以番上下四時遣食醫主食各一人泄之

主客郎中員外郎之職掌二王後及諸蕃朝聘之事

二王之後鄴公介公凡四蕃之國經朝貢之後自相誅絕及有罪滅者蓋三百餘國今所存者七十餘蕃

其朝貢之儀享宴之數高下之等往來之命皆載於

鴻臚之職焉二王後子孫視正三品鄴公歲賜絹三百米粟亦如之介公減三之一殊俗人

朝者始至之州給牒覆其人數謂之邊牒蕃州都督

刺史朝集日視食品給以衣冠袴褶乘傳者日四驛乘

驛者六驛供客食料以四時輪鴻臚季終句會之客

初至及辭設會第一等視三品第二等視四品第三

等視五品蕃望非高者視散官而減半參日設食路

由大海者給所羊豕皆一西南蕃使還者給入海程

糧西北諸蕃則給度磧程糧蕃客請宿衛者奏狀貌

年齒突厥使置市坊有貿易錄奏為質其輕重太府

丞一人泄之蕃王首領死子孫襲初授官兄弟子降

一品兄弟子代攝者嫡年十五還以政使絕域者還

上聞見及風俗之數

宜供饋贈賜之數

兵部尚書一員正三品

原注南朝謂之五兵侍郎二員

正四品下郎中二員從五品上員外郎二員從六品上

主事四人從八品下

令史三十人書令史六十人制書令史十三人甲庫令史十二人亭

長八人掌固十二人

職方郎中一員從五品上員外郎一員從六

品上主事二人從九品上

令史四人書令史九人掌固四人

駕部郎中

一員從五品上員外郎一員從六品上主事三人

新書二人

從九品上

令史十人書令史二十人掌固四人

庫部郎中一員從五

品上員外郎一員從六品上主事二人從九品上

令史七人

書令史十五

人掌固四人

兵部尚書侍郎之職掌天下武官選授及地圖與甲

仗之政令其屬有四一曰兵部二曰職方三曰駕部

四曰庫部總其職務而行其制命凡中外百官之事

由於所屬咸質正焉凡選授之制每歲集於孟冬去
王城五百里以上旬千里之內以中旬千里之外以

下旬尚書侍郎分爲三銓原注尚書爲中銓侍郎分東西銓凡試能

有五原注五謂長垛馬步射馬槍步射應對互有優長即可取之較異有三原注三謂

驍勇藝及可爲統領之用審其功能而定其留放所以錄才藝備

軍國辨虛冒敘勲勞也然後據其資勞量爲注擬原注

五品已上送中書門下六品已下量資注定其在凡軍鎮要籍不得赴選委節度使銓試其等第申省

官階注擬團甲進甲皆如吏部之制凡大選終於季

春之月所以約資序之淺深審才畧之優劣軍國之

用在焉凡將出征告廟授斧鉞軍不從令大將專決還日具上其罪凡發兵降敕書於尚書尚書

下文符放十人發十馬軍器出十者皆不待敕衛士
番直發一人以上必覆奏諸蕃首領至則備威儀郊
導凡俘馘酬以絹入
鈔之俘歸於司農

郎中一人掌判帳及天下武官之階品衛府之名數

凡敘階有二十九將軍之階

原注具於敘目

凡敘階之法一

如文散官之制凡天下之府五百九十有四有上中

下並載於諸衛之職凡應宿衛官各從番第凡千牛

備身左右及太子千牛備身皆取三品已上職事官

子孫四品清官子儀容端正武藝可稱者充五考本

司隨文武簡試聽選

原注四品謂諸司侍郎左右庶子也

凡殿中省進

馬取左右衛三衛及高蔭簡儀容可觀者補充簡試

同千牛例僕寺進馬亦如之五品已下七品已上五年多至八年年滿簡送吏部不第者如初無文聽以武選凡左右衛親衛勳衛翊衛及左右率府親勳翊衛及諸衛之翊府通謂之三衛擇其資蔭高者爲親衛其次者爲勳衛及率府之親衛又次者爲翊衛及率府之勳衛又次者爲翊衛及率府之翊衛又次者爲親王府之執仗執乘量遠邇以定其番第應補之人周親已上有犯刑戮者配令兵部上下凡諸衛及率府三衛貫京兆河南蒲同華岐陝懷汝鄭等州皆令番上餘州皆納資

長上自四品以上皆番上於兵部以遠近爲八番三月以上三

千里外者免番輸資如文散官唯追集乃上六品以下尚書省送符懷化大將軍歸德大將軍配諸衛上下餘直諸衛爲十二番皆月上忠武將軍以下遊擊將軍以上每番閱強毅者直諸衛番滿有將畧者以名凡左右衛之三衛分爲五仗凡王公已下皆有親聞事帳內限年十八已下舉諸州率萬人以充之皆限十周年則聽其簡試文理高者送吏部其餘留本司全下者退還本色凡兵士隸衛各有其名左右衛曰驍騎左右驍衛曰豹騎左右武衛曰熊渠左右威衛曰羽林左右領軍衛曰射聲左右金吾衛曰伏飛東宮左右衛率府曰超乘左右司禦率府曰旅賁左右清道率府曰直蕩總名曰衛士皆取六品已下子孫

及白丁無職役者點充凡三年一簡點成丁而入六十而免量其遠邇無定番第凡衛士各立名簿其三年已來征防差遣仍定優劣爲三第每年正月十日送本府印記仍錄一道送本衛府若有差行上番折衝府據簿而折之凡差衛士征戍鎮防亦有團伍其善弓馬者爲越騎團餘爲步兵團主帥已下統領之火十人有六駄馬若父兄子弟不併遣之若祖父母老疾家無兼丁免征行及番上其居常則皆習射唱大角歌番集之日府官率而課試凡左右金吾衛有角手諸衛有弩手左右羽林軍有飛騎及左右萬騎

曠騎天下諸軍有健兒皆定其名籍每季上中書門
下凡關內有團結兵秦成岷渭河蘭六州有高麗羌
兵黎雅邛翼茂五州有鎮防團結兵天下諸州差兵
募取戶殷丁多人材驍勇選前資官勲官部分強明
堪統攝者節級擢補主帥以領之其義征者別爲行
伍不入募人之營凡軍行器物皆於當州分給之如
不足則令自備貧富必以均焉凡諸州軍府應行兵
之名簿器物之多少皆申兵部軍散之日亦錄其存
亡多少以申而勘會之凡諸道迴兵糧糒之物衣資
之費皆令所在州縣分而給之

郎中一人掌判簿以總軍戎差遣之名數凡天下節度使有八若諸州在節度使內者皆受節度焉其福州經畧使登州平海軍則不在節度之內凡親王總戎曰元帥文武官總統者則曰總管以奉使言之則曰節度使有大使副使判官若大使加旌節以統軍置木契以行凡將帥出行兵滿一萬人已上置長史司馬倉曹兵曹冑曹等參軍各一人五千人已上減司馬諸軍各置使一人五千人已上置副使一人一萬人已上置營田副使一人每軍各有倉兵冑三參軍其橫海高陽唐興恒陽北平等五軍皆本州刺史爲

使凡鎮皆有使一人副使一人萬人已上置司馬倉
兵二曹參軍五千人已下減司馬凡諸軍鎮每五百
人置押官一人千人置子總管一人五千人置總管
一人凡諸軍鎮副使已上皆四年一替總管已下二
年一替押官隨兵交替凡諸軍鎮大使副使已下皆
有廉人別奏以從之凡幸三京卽東都南北衙皆置
左右屯營別立使以統之若在都則京城亦如之凡
大將出征皆告廟授鉞辭齊太公廟訖不宿於家臨
軍對寇士卒不用命並得專行其罰旣捷及軍未散
皆會衆而書勞與其費用乃告太廟元帥凱旋之日

皆使郊勞有司先獻捷於太廟又告齊太公廟
員外郎一人掌貢舉及雜請之事凡貢舉每歲孟春
亦與計偕有二科一曰平射二曰武舉凡科之優劣
勲獲之等級皆審其實而受署焉

員外郎一員掌判南曹每歲選人有解狀簿書資歷
考課必由之以覈其實乃上三銓進甲則署焉

職方郎中員外郎之職掌天下地圖及城隍鎮戍烽
堠之數辨其邦國都鄙之遠近及四夷之歸化凡五
方之區域都邑之廢置疆場之爭訟者舉而正之

凡

經非州縣增廢五年
乃修歲與版籍偕上

凡天下上鎮二十中鎮九十下

鎮一百三十五上戍十有一中戍八十六下戍二百四十五凡烽堠所置大率相去三十里其逼邊境者築城置之每烽置帥一人副一人凡州縣城門及倉庫門須有備守

凡蕃客至鴻臚訊其國山川風土爲圖奏之副上於職方殊俗入朝者圖

其容狀衣服以聞

駕部郎中員外郎之職掌邦國輿輦車乘傳驛牋牧官私馬牛雜畜簿籍辨其出入司其名數

凡給馬者一品八匹

二品六匹三品五匹四品五匹四匹六品三匹七品以下二品給傳乘者一品十馬二品九馬三品八馬四品五品四馬六品七品二馬八品九品一馬三品以上敕召者給四馬五品三馬六品以下有差凡三十里一驛天下驛凡一千六百三十九而監牧六

十有五皆分使統之

凡驛馬給地四頃蒔以苜蓿凡險阻無水草鎮戍者視路要隙

置官馬水

若畜養之宜孳生之數皆載於太僕之職

驛有舟

凡傳驛馬驢每歲上其死損肥瘠之數

凡諸衛有承直之馬凡諸司有

備運之牛皆審其制以定數焉

庫部郎中員外郎之職掌邦國軍州戎器儀仗

凡戎器色

別而異處以衛尉幕士暴涼之京衛旗畫蹲獸立禽行幸則給飛走旗凡諸衛儀仗以御史蒞其度掌武庫器仗則兵部長官蒞其修完京官五品以上凡元征行者假甲纛旗幡稍諸衛給弓千牛給甲

正冬至陳設并祠祭喪葬所貢之物皆辨其出入之

數量其繕造之功以分給焉

刑部尚書一員正三品

原注隋初改爲都官尚書又改刑部

侍郎一員正

四品下郎中二員新書從五品上原注隋曰憲部郎員

外郎二員新書從六品上主事四人從九品上令史十

令史三十八人亭都官郎中一員從五品上員外郎一

員從六品上主事二人從九品上令史九人書令史比

部郎中一員從五品上員外郎一員從六品上主事二

人新書從九品上令史十四人書令史二十司門郎中

一員從五品上員外郎一員從六品上主事二人從九

品上令史六人書令史

刑部尚書侍郎之職掌天下刑法及徒隸勾覆關禁

之政令其屬有四一曰刑部二曰都官三曰比部四

曰司門總其職務而行其制命凡中外百司之事由
於所屬咸質正焉

郎中員外郎之職掌貳尚書侍郎舉其典憲而辨其
輕重凡文法之名有四一曰律二曰令三曰格四曰
式凡律十有二章一名例二禁衛三職制四戶婚五
廐庫六擅興七賊盜八鬪訟九詐僞十雜律十一捕
亡十二斷獄而大凡五百條令二十有七篇分爲三
十卷第一至第七曰官品職員八祠九戶十選舉十
一考課十二官衛十三軍防十四衣服十五儀制十
六鹵簿十七公式十八田十九賦役二十倉庫二十

一廐牧二十二關市二十三醫疾二十四獄官二十
五營繕二十六喪葬二十七雜令而大凡一千五百
四十六條凡格二十四篇式三十三篇以尚書御史
臺九寺三監諸軍爲目凡律以正刑定罪令以設範
立制格以禁違正邪式以軌物程事乃立刑名之制
五焉一笞二杖三徒四流五死笞刑五杖刑五徒刑
五流刑三死刑二而斷獄之大典有十惡八議五聽
六贓贖配之典具在刑法志凡鞠大獄以尚書侍郎
與御史中丞大理卿爲
三司使凡決死刑皆於中書門下詳覆凡死罪枷而杻
婦人及流徒枷而不杻官品及勲散之階第七已上

鎖而不枷在京諸司則徒已上送大理杖已下當司
斷之若金吾糾獲亦送大理凡決大辟罪在京者行
決之司皆五覆奏在外者刑部三覆奏若犯惡逆已
上及部曲奴婢殺主者一覆奏凡京城決囚之日減
膳徹樂每歲立春後至秋分不得決死刑大祭祀及
齋戒朔望上下弦二十四氣雨未晴夜未明斷屠月
日及休假亦如之凡犯流罪已下應除免官當未奏
身死者免其追奪流移之人皆不得弃放妻妾及私
遁還鄉至六載然後聽仕卽本犯不應流而特配流
者三載已後聽仕其應徒則皆配居作凡禁囚五日

一慮凡鞫獄官與被鞫人有親屬讐嫌者皆聽更之
凡在京諸司見禁囚每月二十五已前本司錄其所
犯及禁時月日以報刑部凡國有赦宥之事先集囚
徒於闕下命衛尉樹金雞待宣制訖乃釋之

都官郎中員外郎之職掌配役隸簿錄俘囚以給衣

糧藥料以理訴競雪冤凡公私良賤必周知之凡反

逆相坐沒其家爲官奴婢一免爲蕃戶一歲三番役再免

爲雜戶亦曰官戶二歲五番役每番皆一月三免爲良民皆因赦宥所

及則免之年六十及廢疾雖赦令不該亦並免爲蕃

戶新書官戶七十則免爲良人任所樂處而編附之每歲孟春

上其籍自黃口以上印臂仲冬送於都官條其生息而按比之樂工歌醫騙馬調馬羣頭裁接之人皆取焉附貫州縣者按比如平民不番上歲督丁資爲錢一千五百丁婢中男五輸其一侍丁殘疾半輸凡居作者差以三等四歲以上爲小十一以上爲中二千以上爲丁丁奴三當二役中奴丁婢二當一役中婢一役凡初被沒有伎藝者各從其能而配諸司婦人工巧者入於掖庭其餘無能咸隸司農

比部郎中員外郎之職掌勾會諸司百僚俸料公廨贓贖調斂徒役課程逋懸數物周知內外之經費而總勾之凡內外官料俸以品第高下爲差外官以州縣府之上中下爲差凡稅天下戶錢以充州縣官月料皆分公廨本錢之利羈縻州所補漢官給以當土

之物關監之官以品第爲差其給以年支輕貨鎮軍
司馬判官俸祿同京官鎮戍之官以鎮戍上中下爲
差凡京師有別借食本每季一申省諸州歲終而申
省比部總勾覆之

京師倉庫三月一比諸司諸使京
都四時勾會於尚書省皆以後季

勾前季諸州則
歲終總勾焉

凡倉庫出納營造備市丁匠工程賦

贖賦斂勲賞賜與軍資器仗和糴屯牧亦勾覆之

司門郎中員外郎之職掌天下諸門及關出入往來

之籍賦而審其政

凡著籍月一易之流內官記官爵
名姓流外記年齒貌狀非遷解不

除凡有名者降墨敕勘銅魚木契然後入監門校尉
巡日送平安凡奏事遣官送之晝題時刻夜題更籌
命婦諸親朝參者內侍監校尉涖索凡輦輦車不
入宮門關遺之物揭於門外榜以物色葺年沒官凡

關二十有六爲上中下之差京城四面關有驛道者爲上關餘關有驛道及四面無驛道者爲中關他皆爲下關關所以限中外隔華夷設險作固閑邪正禁者也凡關呵而不征司貨賄之出入其犯禁者舉其貨罰其人凡度關者先經本部本司請過所在京則省給之在外則州給之而雖非所部有來文者所在

亦給

出塞踰月者給行牒獵手所過給長籍三月一易蕃客往來閱其裝重入一關者餘關不議

工部尚書一員正三品

原注南朝謂之起部有所營造則置起部尚書畢則省之隋初

改置工部尚書

侍郎一員正四品下郎中一員從五品上員外

郎一員從六品上主事二人

新書

從九品上

今史十二人書今史

二十一人計史一人屯田郎中一員從五品上員外郎

一員從六品上主事二人從九品上令史七人書令史十二人計史二人

新書掌固四人虞部郎中一員從五品上員外郎一員從六品

上主事二人從九品上令史四人書令史九人掌固四人水部郎中一

員從五品上員外郎一員從六品上主事二人從九品

上令史四人書令史九人掌固四人

工部尚書侍郎之職掌天下百工屯田山澤之政令

其屬有四一曰工部二曰屯田三曰虞部四曰水部

總其職務而行其制命凡中外百司之事由於所屬

咸質正焉

郎中員外郎之職掌經營興造之衆務凡城池之修
濬土木之繕葺工匠之程式咸經度之凡京師東都
有營繕則下少府將作以供其事役干功者先奏凡工匠以州縣爲團
五人爲火五火置長一人四月至七月爲長功二月
三月八月九月爲中功十月至正月爲短功雇者日
爲絹三尺內中尚巧匠無作則
納資凡津梁道路治以九月

屯田郎中員外郎之職掌天下屯田之政令凡邊防
鎮守轉運不給則設屯田以益軍儲其水陸腴瘠播
種地宜功庸煩省收率等級咸取決焉諸屯田役力
各有程數凡天下諸軍州管屯總九百九十有六大
者五十頃小者二十頃凡當屯之中地有良薄歲有

新書食貨志

王

義官 尚書工部



奏不報郢又奏五城舊屯其數至廣以開渠之糧貸
諸城約以冬輸又以開渠功直布帛先給田者據估
轉穀如此則闕輔免調發五城田闢比之浚渠利十
倍也時楊炎方用事郢議不用而陵楊渠亦不成然
振武天德良田廣袤千里元和中和振武軍饑宰相李
絳請開營田可省度支漕運及絕和糴欺隱憲宗稱
善乃以韓重華爲振武京西營田和糴水陸運使起
代北墾田三百頃出賦罪吏九百餘人給以耒耜耕
牛假借種糧使償所負粟二歲大熟因募人爲十五
屯每屯百三十人耕百畝就高爲堡東起振武西
踰雲州極於中受降城凡六十萬石省度支錢二十
萬緡重華入朝奏請益開田五千頃法用人七千可
以盡給五城會李絳已罷後宰相持其議而止憲宗
末天下營田皆雇民或借傭以耕又以瘠地易上地
民問苦之穆宗卽位詔還所易地而耕以官兵耕官
地者給三之一以終身靈武邠寧土廣肥而民不知
耕大和末王起奏立營田後党項河西邠寧節度使
畢誠亦募士開營田歲收三十萬斛省度支錢凡
萬緡○案舊書食貨志無屯田條故附於此

京文武職事官有職分田京兆河南府及京縣官亦
準此凡在京諸司有公廨田皆視其品命而審其分
給

虞部郎中員外郎之職掌京城街巷種植山澤苑囿

草木薪炭供頓田獵之事

每歲春以戶小兒戶婢仗
內蒔種溉灌冬則謹其蒙

覆凡採捕漁獵必以其時

春夏不
伐木

凡京兆河南二都

其近爲四郊三百里

正月五月九月

皆不得弋獵採捕

凡郊
祠神

壇五岳名山樵採芻牧皆有
禁距墮三十步外得耕種

殿中太僕所管閑廐馬

兩都皆五百里內供其芻藁其關內隴右西使南使

諸牧監馬牛駝羊皆貯藁及芟草其柴炭木槿進內

及供百官蕃客並於農隙納之

山澤有寶可供用者以聞

水部郎中員外郎之職掌天下川瀆陂池之政令以

導達溝洫堰決河渠凡舟楫溉灌之利咸總而舉之

凡天下水泉三億二萬三千五百五十九其在遐荒

絕域迨不可得而知矣其江河自西極達於東溟中

國之大川也其餘百三十五水是爲中川其又千二

百五十二水斯爲小川也若渭洛汾濟漳淇淮漢皆

直達方域通濟舳舻從有之無利於生人者也凡天

下造舟之梁四

原注河則蒲津大陽河陽洛則孝義也

石柱之梁四

原注

洛則天津永濟中橋霸則霸

木柱之梁三

原注皆渭川便橋中渭橋東渭橋也

巨梁

十有一皆國工修之其餘皆所管州縣隨時營葺其
大津無梁皆給船人量其大小難易以定其差凡院
穴皆有標京畿有渠長斗門長諸州隄堰刺史縣令
以時檢行而泄其決築有埭則以下戸分牽禁爭利
者

唐書卷第六十五

唐書卷第六十六

職官三

職官三

門下省

原注秦漢初置侍中曾無臺省南北朝皆因之

侍中二員正二品

原注隋曰納言又名侍內武德為納言又改為侍中武德定令侍中正三

品大厯二年十一月九日敕升為正二品也

門下侍郎二員正三品

原注隋曰黃門侍郎武德定令中書門下侍郎同尚書侍郎正

四品上大厯二年九月敕升為正三品也給事中四員正五品上原注隋曰

四員位次門下侍郎錄事四人從七品上主事四人從

武德定令曰給事中

八品下原注隋曰給事中八品下原注隋曰給事中八品下

仁亭長六人掌固十人左散騎常侍二員正三

品原注魏晉置散騎常侍侍郎與侍中黃門侍郎共平

隋初省散騎侍郎置常侍四人從三品掌陪從朝直煬

帝又省之武德初以為加官貞觀初置常侍二人隸門

下省顯慶二年又置二員隸中書省始有左右之號並

金蟬珥貂左常侍與侍中左貂右常侍與中書令右貂

謂之八貂廣德二年五月升為正三品加置四員興元

元年正月左右各加一員貞元四年正月敕依舊四員

左左諫議大夫四員正四品下原注秦漢曰諫大夫光武

議大夫七員從四品下武德四年敕置四員正五品上

大厯四年敕只四員正五品上七年三月敕其諫議四

員內供奉不得為正員至貞元四年五月十五日敕諫

議分為左右加置八員四員隸門下省為左四員隸中

書省為右會昌二年十一月中書奏隋於門下省置諫

議大夫七員從四品下今正五品上自大厯二年以

中書侍郎升為正四品下分為左右以備兩省四品之

望升為正四品下原注古無其

與丞郎出入迭用起居郎二員從六品上原注古無其

以重其選敕可之

居舍人二員貞觀二年省起居舍人移其職於門下置起居郎二員顯慶中又置起居舍人始與起居郎分在左右令史三人贊者左補闕二員新書從七品上左拾

遺二員新書從八品上原注古無此官名天后垂拱元

年切於旁求補闕拾遺未宏於注選瞻言共理必藉衆

才寄以登賢期之進善宜置左右補闕各二員從七品

上左右拾遺各二員從八品上掌供奉諷諫行立次左

右史之下仍附於令天授二年二月加置三員通前五

員大厯四年補闕拾遺各置內供奉兩員也典儀二人

年五月十一日敕補闕拾遺宜各置兩員也

從九品下原注南齊有典儀錄事一員梁有典儀之官

皆輕貞觀末李義府為贊者十二人原注隋太常鴻臚

之自是用士人為之贊者十二人原注隋太常鴻臚

朝因置之城門郎四員從六品上原注漢有城門校尉

隸門下省城門郎置四員從六品皇城諸門啟閉之

節隋改校尉為城門郎置四員從六品皇朝因之令史

一人新書令史二人門僕八百人門僕晉代有之皇

朝隸城符寶郎四員從六品上原注周有典瑞之職秦

兩漢得秦六璽及傳國璽後代傳之隋置符璽郎二員

從六品天后惡璽字改為寶其受命傳國等八璽文並

改雕寶字神龍初復為符璽郎開元初又改為符寶從

璽文也令史二人書令史三人主寶六人唐主符三

十人唐主節十人唐主節十八人唐主節

舊制宰相常於門下省議事謂之政事堂永淳二年

七月中書令裴炎以中書執政事筆遂移政事堂於

中書省開元十一年中書令張說改政事堂於中書

門下列五房於其後一曰吏房二曰樞機房三曰兵

房四曰戶房五曰刑房禮房分曹以主衆務焉

其政事印改為中書門下之印也

侍中之職掌出納帝命緝熙皇極總典吏職贊相禮

儀以和萬邦以弼庶務所謂佐天子而統大政者也
凡軍國之務與中書令參而總焉坐而論之舉而行
之此其大較也凡下之通上其制有六一曰奏抄二
曰奏彈三曰露布四曰議五曰表六曰狀皆審署申
覆而施行焉

自露布以上乃審其餘覆奏
畫制可而授於尚書省焉

凡法駕行

幸則負寶而從大朝會大祭祀則版奏中嚴外辦以
爲出入之節輿駕還宮則請解嚴所以告禮成也凡
大祭祀皇帝致齋旣朝則請就齋室將奠則奉玉及
幣以進盥手則取匱以沃洗爵則酌鬯水以奉及贊
酌汎齊進福酒以成其禮焉若享宗廟則進瓚而贊

酌鬱酒以裸既裸則贊酌醴齊其餘如饗神祇之禮
籍田則奉耒以贊事凡諸侯王及四夷之君長朝見
則承詔而勞問之臨軒命使冊后及太子則承詔以
命之凡制敕慰問外方之臣及徵召者則監其封題
若發驛遣使則給其傳符以通天下之信凡官爵廢
置刑政損益皆授之於記事之官既書於策則監其
記注焉凡文武職事六品已下所司進擬則量其階
資校其才用以審定之若擬職不當隨其優屈退而
量焉

門下侍郎掌貳侍中之職凡政之弛張事之與奪皆

參議焉大祭祀則從升壇以陪禮皇帝盥手則奉巾

以進既悅則奠巾於篚奉瓠爵

新書
匏爵

以贊獻凡元正

冬至天子視朝則以天下祥瑞奏聞

侍中關則泣封
符券給傳驛

給事中掌陪侍左右分判省事凡百司奏抄侍中審

定則先讀而署之以駁正違失

詔敕不便者塗竄而
奏還謂之塗歸季終

奏駁正
之目

凡制敕宣行大事則稱揚德澤褒美功業覆

奏而請施行小事則署而頒之凡國之大獄三司詳

決若刑名不當輕重或失則援法例退而裁之凡發

驛遣使則審其事宜與黃門侍郎給之其緩者給傳

卽不應給罷之凡文武六品已下授職官所司奏擬

則校其仕歷淺深功狀殿最訪其德行量其才藝若
官非其人理失其事則白侍中而退量焉若宏文館
圖書之繕寫讐校亦課而察之凡天下冤滯未申及
官吏刻害者必聽其訟與御史中書舍人同計其事
宜而申理之

散騎常侍掌侍奉規諷備顧問應對

原注寶曆二年
敕左右散騎常

侍各置參官兩人令白揀擇
聞奏參典亦置兩人後省

諫議大夫掌侍從贊相規諫諷諭凡諫有五一日諷
諫二曰順諫三曰規諫四曰致諫五曰直諫

起居郎掌起居注錄天子之言動法度以修記事之

史

天子御正殿則郎居左舍人居右有命俯陞以聽退而書之季終以授史官

凡記事之

制以事繫日以日繫月以月繫時以時繫年必書其

朔日甲乙以紀厯數典禮文物以考制度遷拜旌賞

以勸善誅伐黜免以懲惡季終則授之國史焉自漢

獻帝後歷代帝王有起居注著作編之每季爲卷送

史館也

貞觀初以給事中諫議大夫兼知起居注或知起居事每仗下議政事起居郎一人執筆

記錄於前史官隨之其後復置起居舍人分侍左右秉筆隨宰相入殿若仗在紫宸內閣則夾香案分立

殿下直第二螭首和墨濡筆皆卽坳處時號螭頭高宗臨朝不決事有所奏唯辭見而已許敬宗李義府

爲相奏請多畏人之知也命起居郎舍人對仗承旨仗下與百官皆出不復聞機務矣長壽中宰相姚璹

建議仗下後宰相一人錄軍國政要爲時政紀月送史館然率推美讓善事非其實未幾亦罷而起居郎

唐書卷之六
猶因制敕稍稍筆削以廣國史之闕起居舍人本記
言之職唯編詔書不及他事開元初復詔修史官非
供奉者皆隨仗而入位於起居郎舍人之次及李林
甫專權又廢大和九年詔入閣日起起居郎舍人具紙
筆立螭頭下
復貞觀故事

補闕拾遺之職掌供奉諷諫扈從乘輿凡發令舉事
有不便於時不合於道大則廷議小則上封若賢良
之遺滯於下忠孝之不聞於上則條其事狀而薦言
之

典儀掌殿上贊唱之節及殿廷版位之次凡國有大
禮侍中行事及進中嚴外辦之版皆贊相焉贊者掌
贊唱爲行事之節分番上下謂之番官

城門郎掌京城皇城宮殿諸門啟閉之節奉出納管
鑰開則先外而後內闔則先內而後外所以重中禁
尊皇居也候其晨昏擊鼓之節而啟閉之凡皇城宮
城闔門之鑰先酉而出後戌而入開門之鑰後丑而
出夜盡而入京城闔門之鑰後申而出先子而入開
門之鑰後子而出先卯而入若非其時而有命啟閉
則詣閣覆奏門僕分番上下掌送管鑰

符寶郎掌天子八寶

新書車服志天子有傳國璽及八璽皆玉爲之

及國之

符節辨其所用有事則請於內既事則奉而藏之

新書

車服志初太宗刻受命元璽以白玉爲螭首文曰皇帝景命有德者昌至武后改諸璽皆爲寶中宗卽位

復爲璽開元六年復爲寶天寶初改璽八寶一曰神

書爲寶書十載改傳國寶爲承天大寶

新書車服志藏而不用

二曰受命寶所

以修封禪禮神祇三曰皇帝行寶答疏於王公則用

之四曰皇帝之寶勞來勲賢則用之五曰皇帝信寶

徵召臣下則用之六曰天子行寶答四夷書則用之

七曰天子之寶慰撫蠻夷則用之八曰天子信寶發

番國兵則用之

新書車服志皆泥封

凡大朝會則捧寶以進於

御座

新書車服志進神璽受命璽於御座

車駕行幸則奉寶以從於黃

鉞之內

新書車服志合入璽爲五輿函封

凡國有大事則出納符節

辨其左右之異藏其左而班其右以合中外之契焉

一曰銅魚符

新書車服志初高祖入長安罷隋竹使符班銀莢符其後改爲銅魚符

所

以起軍旅易守長二曰傳符

新書車服志傳信符

所以給郵驛

通制命三曰隨身魚符所以明貴賤應徵召四曰木

契所以重鎮守慎出納五曰旌節所以委良能假賞

罰魚符之制王畿之內左三右一王畿之外左五右

一左者在內右者在外行用之日從第一爲首後事

頒用以次發之周而復始

新書車服志京都留守折衝府提兵鎮守之所及左

右金吾宮苑總監牧監皆給之宮殿門城門給交魚符巡魚符左廂右廂給開門符閉門符亦左符進內

右符監門掌之蕃國亦給之雌雄各十二銘以國名雄者進內雌者付其國朝貢使各齎其月魚而至不

合者

奏大事兼敕書小事但降符函封遣使合而行之

傳符之制太子監國曰雙龍之符左右各十京都留

守曰麟符左二十其右一十有九東方曰青龍之符

西方曰騶虞之符南方曰朱雀之符北方曰元武之

符左四右三左者進內右者付外新書車服志行隨軍所亦給之

身符之制左二右一新書車服志左者進內右者隨身太子以玉新書車服

志契召勘親王以金庶官以銅佩以爲飾新書車服志皆題其

合乃赴位姓名官有貳者加左右皆盛以魚袋刻姓名者去

三品以上飾以金五品以上飾以銀官而納焉不刻者傳而佩之新書車服志有傳符銅

封符及封魚函用之有銅魚而無傳符者給封符印發驛

符封函用之天子巡幸則京師東都留守給留守印諸司從行者木契之制太子監國則王畿之內左右

給行從印

各三王畿之外左右各五庶官鎮守則左右各十

新書

車服志皇帝巡幸太子監國有軍旅之事則用之王公征討皆給焉左右各十九太極殿前刻漏所亦以左契給之右以授承天門監門晝夜勘合然後鳴鼓元武門苑內諸門有喚人木契左以進內右以授監門有敕召者用之魚契所降皆旌節之制命大將帥有敕書尚書省符與左同乃用旌節之制命大將帥及遣使於四方則請而佩之旌以專賞節以專殺

新書

宏文館

後漢有東觀魏有崇文館宋有元史二館南齊有總

明館梁有士林館北齊有文林館後周有崇文館皆著撰文史鳩聚學徒之所也武德初置修文館後改爲宏文館貞觀元年詔京官職事五品已上子嗜書者二十四人隸館習書出禁中書法以授之後避太子諱改曰昭文館神龍元年改宏文館曰昭文館以避孝敬皇帝之名二年曰修文館景雲中復爲昭文館開元七年復爲宏文館隸門下省

學士無員數自武德已來皆妙簡賢良爲學士故事五

品已上稱學士六品已下爲直學士又有文學直館學

士皆他官領之不定員數館中有四部書及圖籍其後又置

儀鳳中置詳正自垂拱已後皆宰相兼領號爲館主常學士校理圖籍

令給事中一人判館事

景龍二年置大學士四人以象

士十二人以象十二時景雲減其員數開元七年置校

書郎又有校理讐校錯誤等官長慶三年與詳正學士

講經博士皆罷專以五品以上曰學士

六品以下曰直學士未登朝為直館

學生三十人

三十人校書郎二人從九品上

令史二人楷書手三十人

二人揚書手三人筆匠三人熟紙裝潢

匠九人

宏文館學士掌詳正圖籍教授生徒凡朝廷有制度

沿革禮儀輕重得參議焉

校書郎掌校理典籍刊正錯謬其學生教授考試如

國子學之制焉

中書省

原注秦始置中書謁者漢元帝去謁者二字歷

代但云中書後周謂之內史省隋因為內史省

中書省

中書省

置內史監令各一員煬帝改為內書省
武德復為內史省三年改為中書省

中書令二員正二品

原注漢魏品卑而付重魏置監令
各一員歷南朝不改隋省監置令

二人正三品隋文帝廢三公府僚令中書令與侍中知
政事遂為宰相之職隋曰內書令武德曰內史令尋改
為中書令本正三品大厯二年十一月
九日敕與侍中同升正二品自後不改
中書侍郎二員

正三品

原注漢置中書掌密詔有令僕丞郎四官魏曰
中書郎晉加侍字隋置內書省改為內書侍郎

正四品武德初為內史侍郎三年改為中書侍郎武德
定令與尚書侍郎俱第四品大厯二年九月敕與門下

侍郎共升為
正三品也

中書舍人六員正五品上

原注曹魏於中
書置通事一人

掌呈奏案章高貴鄉公於通事下加舍人二字晉於中
書置舍人通事各一人自魏晉齊梁詔詰皆出於中書
令中書侍郎中書通事舍人但掌呈奏而已或通事有
文字者別敕知制詰至梁武制詰專令舍人掌之兼去
通事二字但云中書舍人隋曰內史舍人置入員掌制
詰品第六尋升五品上煬帝改為內書舍人置四員武

德初為內史舍人三主書四人從七品上主事四人從

年改為中書舍人

八品下令史二十五人主書二書令史五十八人能書四人

人蕃書譯語十人乘驛二十人傳制十人亭長

十八人掌函掌案各二十人裝制敕匠一右散騎常侍

二員正三品右諫議大夫四員正四品下右補闕二員

新書從七品上右拾遺二員

新書六員從八品上起居舍人

二員從六品上楷書手四人通事舍人十六員從六品上

原注通事舍人秦謂者之官也掌賓客贊受事隸光祿

勳晉置舍人通事各一人隸中書東省曰通事舍人隋

因晉制置十六人從六品上又為通事謁者武德初廢

謁者臺改通謁者為通事舍人隸四方館屬中書省也

令史十人典謁十人亭長

十八人掌固二十四人

武德貞觀故事以尚書省左右僕射各一人及侍中

中書令各二人爲知政事官其時以他官預議國政

者云與宰相參議朝政或云平章國計或云專典樞

密或云參議政事

太宗時杜淹以吏部尚書參議朝政魏徵以秘書監參預朝政其後

或曰參議得失參知政事之類其名非一皆宰相職也貞觀八年僕射李靖以疾辭位詔疾小瘳兩三日

一至中書門下平章事貞觀十七年李勣爲太子詹

而平章事之名起於此

事特詔同知政事始謂同中書門下三品

謂同侍中而而同三品之名起於此然二名不專用而他官居職

者猶假他名如故自高宗以後爲宰相者必加同中書門下三品雖品高者亦然自是僕射常帶此職自

惟三公三師中書令則否

餘非兩省長官預知政事者亦皆以此爲名永淳中始詔郭正一郭待舉魏元同等與中書門下同受進

止平章事

平章事入銜自待舉等始

自天后已後兩省長官及同

中書門下三品并平章事爲宰相其僕射不帶同中

書門下三品者但釐尚書省而已總章二年東臺侍

郎張文瓘西臺侍郎戴至德等始以同中書門下三

品著之入銜自是相承至今永淳二年黃門侍郎張

齊賢知政事稱同中書門下平章事自後兩省長官

及他官執政未至侍中中書令者皆稱同中書門下

平章事也

宰相事無不統故不以一職名官自開元以後常以領他職實欲重其事而反輕宰

相之體故時方用兵則爲節度使時崇儒學則爲大學士時急財用則爲鹽鐵轉運使又其甚則爲延資

庫使至於國史太清宮之類其名頗多皆不足取法故不著其詳

中書令之職掌軍國之政令緝熙帝載統和天人入

則告之出則奉之以釐萬邦以度百揆蓋佐天子而

執大政也凡王言之制有七一曰冊書立皇后皇太子封諸王臨

軒冊命二曰制書大賞罰敕宥慮四三曰慰勞制書

則用之三曰制書大除授則用之三曰慰勞制書

褒勉贊勞四曰發敕廢置州縣增減官吏發兵除免

五曰敕旨百官奏請施六曰論事敕書戒約臣下七

曰敕牒隨事承制不易皆宣署申覆而施行之凡大

祭祀羣神則從升壇以相禮享宗廟則從升阼階親

征纂嚴戒敕百僚冊命親賢臨軒則使讀冊若命之
於朝則宣而授之凡冊太子則授璽綬凡制詔宣傳

文章獻納皆授之於記事之官

中書侍郎掌貳令之職凡邦國之庶務朝廷之大政皆參議焉凡臨軒冊命大臣令爲之使則持冊書以授之凡四夷來朝臨軒則受其表疏升於西階而奏若獻贄幣則受之以授於所司

中書舍人掌侍奉進奏參議表章凡詔旨敕制及璽書冊命皆按典故起草進畫旣下則署而行之其禁有四一曰漏泄二曰稽緩三曰違失四曰忘悞所以重王命也制敕旣行有悞則奏而正之凡大朝會諸方起居則受其表狀而奏之國有大事若大尅捷及

大祥瑞百僚表賀亦如之凡冊命大臣於朝則使持

節讀冊命之凡將帥有功及有大賓客皆使勞問之

凡察天下冤滯與給事中及御史三司鞫其事凡百

司奏議文武考課皆預裁焉

以久次者一人爲閣老判本省雜事又一人知

制誥專進畫給食於政事堂其餘分署制敕以六員分押尚書六曹佐宰相判案同署乃奏唯樞密遷授不預姚崇爲紫微令奏大事舍人爲商量狀與本狀皆下紫微令判二狀之是否然後乃奏開元初以他官掌詔敕策命謂之兼知制誥肅宗卽位又以他官知中書舍人事兵興急於權便政去臺閣決遣專出宰相自是舍人不復押六曹之奏會昌末宰相李德裕建議臺閣常務州縣奏請復以舍人平處可否先是知制誥率用前行正郎宣宗時選尚書郎爲之

散騎常侍諫議大夫補闕拾遺掌事同左省

通事舍人掌朝見引納及辭謝者於殿廷通奏凡近臣入侍文武就列引以進退而告其拜起出入之節凡四方通表華夷納貢皆受而進之凡軍旅之出則受命慰勞而遣之既行則每月存問將士之家以視其疾苦凱旋則郊迓之皆復命凡致仕之臣與邦之耆老時巡問亦如之

開元十二年置漢魏已來職在祕書梁於文德殿內

藏聚羣書北齊有文林館學士後周有麟趾殿學士
皆掌著述隋平陳之後寫羣書正副二本藏於宮中
其餘以實祕書外閣煬帝於東都觀文殿東西廂貯
書自漢延嘉至隋皆祕書掌國籍而禁中之書時或
有焉及太宗在藩時有秦府學士十八人其後宏文
崇文二館皆有元宗卽位大校羣書開元五年於乾
元殿東廊下寫四部書以充內庫置校定官四人
五年置乾元院六年乾元院更號麗正修書院七年
置使及檢校官改修書官爲麗正殿直學士
駕在東都於麗正殿置修書使
八年加文學直又加修撰校理刊正校勘
官十一年置麗正院修書十二年駕在東都
明福門外亦置學士光順門外亦置書院

麗正書院十三年與學士張說等宴於集仙殿因改名集

賢改修書使爲集賢書院學士募能書者爲書直及寫御書人其後亦以

前資常選三衛散官五品以上子孫爲之又置畫其直至十九年以書直畫直搨書有官者爲直院

大明宮所置書院本命婦院屋宇宏敞至德二載置大學士永

泰元年三月詔僕射裴冕等十三人每日於集賢書

院待詔貞元初置編錄官四年罷大學士八年罷校理置校書四人正字二人元和二年復置集

賢校理罷校書正字四年置集賢御書院學士直學士皆用五品如開元故事以學士一人年高者判院

事非登朝官者爲校理餘皆罷云

集賢學士初定制以五品已上官爲學士六品已下爲

直學士每宰相爲學士者爲知院事常侍一人爲副知

院事

學士知院事一人開元初以褚无量馬懷素元行沖相
次知乾元殿寫書及在麗正乃有使名張說代元行沖
改院爲集賢以說爲大學士知院事說懇讓大字詔許
之自是每以宰相一人知院事副知院事一人初宰相
張說知院事以左常侍徐堅爲副知院事因爲故事判
院一人初在乾元殿刊正官一人判事其後因之押院
中使一人自乾元殿寫書則置掌出入宣進奏兼領中
官監守院門掌同宮禁侍講學士開元初褚无量馬懷
素侍講禁中名爲侍讀其後康子元爲侍讀學士修撰

官校理官並無常員以官人兼之待制官古之待詔金

馬門是

初太宗卽位命京官五品以上更宿中書門下兩省以備訪問永徽中命宏文館學士一人日

待制於武德殿西門文明元年詔京官五品以上清官

日一人待制於章善明福門先天末又命朝集使六品

以上二人隨仗待制永泰時勳臣罷節制無職事皆待制集賢門凡十三人崔祐甫爲相建議文官一品以上

更直待制其後著令留院官檢討官皆以學士別敕留

正衙待制官日二人之校書四人正字二人孔目官一人專知御書典四人

知書官八人掌分四庫書書直寫御書一百人

新書九十八人

搨書六人畫直八人

新書六人

裝書直十四人造筆直四人

集賢學士之職掌刊緝古今之經籍以辨明邦國之

大典凡天下圖書之遺逸賢才之隱滯則承旨而徵

唐書六十六
求焉其有籌策之可施於時著述之可行於代者較其才藝而考其學術而申表之凡承旨撰集文章校理經籍月終則進課於內歲終則考最於外

史館

歷代史官隸祕書省著作局皆著作郎掌修國史武德因隋舊制貞觀三年閏十二月始移史館於禁中在門下省北宰相監修國史自是著作郎始罷史職及大明宮初成置史館於門下省之南館門下東西有棗樹七十四株無雜樹開元二十五年新書二十三年誤三月右相李林甫以中書地切樞密記事者官宜附近

史官尹愔奏移史館於中書省北以舊尚樂院充館也

史官

原注古者天子諸侯皆有史官以紀言動厯數之事至後漢明帝召當時名士入東觀撰光武紀而

史官因以他官兼之魏明帝始置著作郎專掌國史隸中書晉改隸祕書省因而不改貞觀年修五代史移史館於禁中史官無常員如有修撰大事則用他官兼之事畢日停

監修國史貞觀已後

多以宰相監修國史遂成故事修撰直館天寶已後他

官兼領史職者謂之史館修撰

四

初入爲直館

以他官兼領或

位卑有才者亦以直館稱

元和六年宰相裴垍奏登朝官領史職者

並爲修撰未登朝官入館者並爲直館修撰中以一人

官高者判館事其餘名目並請不置從之

大中八年廢史館直館二

員增修撰四人分掌四季有令史二人楷書手二十五人楷書十二人寫國史楷書十八人典書四人新書亭長二人掌固六人嘶書裝潢直一人熟紙匠六人

史官掌修國史不虛美不隱惡直書其事凡天地日月之祥山川封域之分昭穆繼代之序禮樂師旅之事誅賞廢興之政皆本於起居注時政記以為實錄然後立編年之體為褒貶焉既終藏之於府

知匭使

天后垂拱二年置匭以達冤滯

有魚保宗者上書請置匭令以受四方之

書乃置銅匭四

其制一房四面各以方色東曰延恩

青匭告義人勸

農之事者投之

南曰招諫

丹匭論時政得失者投之

西曰申冤

白匭陳抑屈者投之

北曰通元

黑匭告天文祕謀者投之

所以申天下之冤滯達萬人

之情狀蓋古建善旌誹謗木之意也天寶九載改匭

爲獻納乾元元年

新書至德元載

復名曰匭垂拱已來常以

諫議大夫及補闕拾遺一人充使受納訴狀每日暮

進內而晨出之也

寶應元年命中書門下擇正直清白官一人知匭以給事中中書舍

人爲理匭使建中二年以御史中丞爲理匭使諫議大夫一人爲知匭使投匭者使先驗副本開成三年

知匭使李中敏以爲非所以廣聰明而慮幽枉也乃奏罷驗副封

翰林院

天子在大明宮其院在右銀臺門內在興慶宮院在

金明門內若在西內院在顯福門若在東都華清宮

皆有待詔之所其待詔者有詞學經術合鍊僧道卜
祝術藝書奕各別院以廩之日晚而退其所重者詞
學武德貞觀時有溫大雅魏徵李百藥岑文本許敬
宗褚遂良永徽後有許敬宗上官儀皆召入禁中驅
使未有名目乾封中劉懿之劉禕之兄弟周思茂元
萬頃范履冰皆以文詞召入待詔常於北門候進止
時號北門學士天后時蘇味道韋承慶皆待詔禁中
中宗時上官昭容獨當書詔之任睿宗時薛稷賈膺
福崔湜又代其任元宗卽位張說陸堅張九齡徐安
貞張垺等召入禁中謂之翰林待詔王者尊極一日

萬機四方進奏中外表疏批答或詔從中出宸翰所

揮亦資其檢討謂之視草故嘗簡當代士人以備顧

問

既而又以中書務劇文書多壅滯乃選文學之士號翰林供奉與集賢院學士分掌制詔書敕開元

二十六年又改翰林供奉爲學士別置學士院專掌內命至德已後天下用兵軍

國多務深謀密詔皆從中出尤擇名士翰林學士得

充選者文士爲榮亦如中書舍人例置學士六人內

擇年深德重者一人爲承旨所以獨承密命故也

凡

免將相號令征伐皆用白麻其後選用益重而禮遇益親至號爲內相又以爲天子私人凡充其職者無定員自諸曹尚書下至校書郎皆得與選入院一歲則遷知制誥未知制誥者不作文書班次各以其官內宴則居宰相之下一品之上德宗好文尤難其選貞元已後爲學

唐書六十六 卷一百一十五 職官一
士承旨者多至宰相焉

內教坊

武德已來置於禁中以按習雅樂以中官充使則天

改爲雲韶府神龍復爲教坊

開元二年又置內教坊於蓬萊宮側有音聲博士

士第一曹博士第二曹博士京都置左右教坊掌俳優雜伎自是不隸太常以中官爲教坊使開成三年

改法曲所處院曰仙韶院

習藝館

本名內文學館選官人有儒學者一人爲學士教習

官人則天改爲習藝館又改爲翰林內教坊以事在

禁中故也

有內教博士十八人經學五人史子集綴文三人楷書二人莊老太一篆書律令吟

詠飛白書并碁各一人開元末館廢以內教博士以下隸內侍省中官為之

祕書省

原注隸中書之下漢代藏書之所有延閣廣內石渠之藏又御史中丞在殿內掌蘭臺祕書圖

籍後漢桓帝延熹二年始置祕書監屬太常寺掌禁中圖書祕文後併入中書至晉惠帝別置祕書寺掌

中外二閣圖書梁武改寺為省

祕書監一員從三品

原注監之名後漢桓帝置魏晉不改後周謂之外史下大夫陪復為

祕書監從第三品煬帝改為祕書令武德復為監

少監二員從四品上

原注少監隋煬

帝置唐初置一員丞一員從五品上

原注魏武帝置丞二人隋置一人正

第五品祕書郎四員

新書三員

從六品上校書郎八人

新書十人

正

九品上正字四人正九品下主事一人

新書無

從九品上

今史四人書令史九人典書八人嘶楷書手十人亭長六人掌固八人熟紙匠十人裝潢匠十人筆匠六人

著作局著作郎二員從五品上佐郎四員新書二員從六品

上校書郎二人正九品上正字二人正九品下楷書手五人令

史一人書吏二人掌固四人

祕書監之職掌邦國經籍圖書之事有二局一曰著

作二曰太史皆率其屬而修其職少監爲之貳丞掌

判省事祕書郎掌甲乙丙丁四部之圖籍謂之四庫

經庫類十史庫類十三子庫類十四集庫類三皆有三本

一曰正二曰副三曰貯凡課寫功程皆分判校書郎掌讐校典籍刊正文章

著作郎佐郎掌修撰碑志祝文祭文與佐郎分判局

事也

司天臺

武德四年改太史監曰太史局隸秘書省龍朔二年改太史局曰渾天監不隸麟臺俄改曰渾儀監長安二年

史局曰渾天監不隸麟臺如故景龍二年改太史

渾儀監復曰太史局隸麟臺如故景龍二年改太史

局曰太史監不隸秘書省景雲元年又為局隸秘書

省踰月為監歲中復為局二年改渾儀監開元二年

復曰太史監十四年太史監復為局天寶元年太史

局復為監自是不隸秘書省乾元元年曰司天臺

司天監一員從

新書作正三品乾元元年改為監升從五品下

一如殿中祕

少監二人從

新書作正四品下

原注本曰太史

書品秩也少監與諸司少監同品也舊有司祿二人掌造

元升為少監與諸司少監同品也舊有司祿二人掌造

祿保章正一人掌教祿生四十一人監候五人掌候天

文觀生九十人掌晝夜伺候天文氣色靈臺郎二人掌

教習天文氣色天文生六十人挈壺正二人掌知漏刻

司辰七十人漏刻典事二十二人漏刻博士九人漏刻

生三百六十人典鍾一百一十二人典鼓八十八人楷

書手二人亭長掌固各四人自乾元元五官正五員正

年別置司天臺改置官吏不同此數也

三

五品上

原注乾元元年置五官有
春夏秋冬中五官之名

副正五員正六品上

丞二員

新書
一員

從七品下主簿二員正七品下主事一人

正八品下五官靈臺郎五員正七品下五官保章正五

員

新書
二員

從八品上

新書
七品上

五官司厯五員

新書
二員

從九品

上

新書
八品上

五官監候五員

新書
三員

從九品下

新書
八品下

五官

挈壺正五員

新書
二員

從八品下

新書
八品上

五官司辰十五員

新書
八員

正九品上漏刻博士二十人

新書
六人

從九品下

五官
禮生

十五人五官楷書手五人令史五人典鍾典鼓三百五
十人天文觀生九十人天文生五十人厯生五十五人

漏生四十人
視品十人

已上官吏皆乾元元年隨監司新置也

初

天文博士二人正八品下厯博士一人從八品上司辰
師五人正九品下裝書厯生掌候天文掌教習天文氣

色掌寫御麻刻漏視品刻漏典
事掌知刻漏檢校刻漏後皆省

司天監掌觀察天文稽定麻數凡日月星辰之變風
雲氣色之異率其屬而占候之凡元象器物天文圖
書苟非其任不得預焉每季錄所見災祥送門下中
書省入起居注歲終總錄封送史館每年預造來年
麻頒於天下五官正掌司四時各司其方之變異冠
加一星珠以應五緯衣從其方色元日
冬至朔望朝會及大禮
各奏方事而服以朝見
靈臺郎掌觀天文之變而占候之凡二十八宿分爲
十二次事具天文志也

保章正司麻監候掌國之麻法造麻以頒四方其麻

有戊寅厯麟德厯神龍厯大衍厯天下測景之處分至表準其詳可載故參考星度稽驗晷景各有典章挈壺正司辰掌諸漏刻以告中星昏明之候也

漏刻博士掌漏刻之法孔壺爲漏浮箭爲刻其箭四十有八晝夜共百刻冬夏之間有長短冬至之日晝漏四十刻夜漏六十刻夏至晝漏六十刻夜漏四十刻春分秋分之時晝夜各五十刻秋分之後減晝益夜凡九日加一刻春分已後減夜益晝九日減一刻二至前後加減遲用日多二分之間加減速用日少候夜以爲更點之節每夜分爲五更每更分爲五點

更以擊鼓為節點以擊鍾為節也

有通元院乾元元年藝術人韓頴劉

垣建議置以藝術召至京師者居之

御史臺

原注秦漢曰御史府後漢改為憲臺魏晉宋改為蘭臺梁陳北朝咸曰御史臺武德因之○新

書至德後諸道使府參佐皆以御史為之謂之外臺復有檢校裏行內供奉或兼或攝諸使下官亦如之東都留臺有中丞二人侍御史一人殿中侍御史二人監察御史三人元和後不置中丞以待御史殿中侍御史監察御史御史主留臺務而三院御史亦不常備

御史大夫一員正三品

原注秦漢之制御史大夫副丞相為三公之官魏晉之後多不

置大夫以中丞為臺主隋諱中復大夫降為正四品武德今改為從三品光宅分臺為左右置左右臺大夫及廢右臺去左右字會昌二年十二月敕大夫秦為正卿漢為副相漢末改為大司空與丞相俱為三公掌邦國刑憲肅正朝廷其任既重品秩宜峻御史中丞二員新書六尚書例升為正三品著之於令

三正四品下原注漢御史臺有二丞掌殿內祕書謂之中丞漢末改為御史長史後漢復為中丞

後魏改為中尉正北齊復曰中丞後周曰司憲中大夫

隋諱中改為治書御史為從五品武德因之貞觀末避

高宗名改為治書御史為中丞置二員本正五品上會昌

二年十二月敕中丞為大夫之貳綠大夫秩崇官不常

置中丞為憲臺長今九寺少卿及諸少監國子司業京

兆少尹並府寺省監之貳皆為四品唯中丞官重品秩

未崇可升為正四品下與侍御史四員新書從六品下

承郎出入迭用著之於令侍御史四員六員從六品下

原注御史之名周官有之亦名柱下史秦改為侍主簿

御史後周曰司憲中士隋為侍御史品第七也

一人從七品下錄事二人從九品下主事二人從九品

上令史十七人殿中侍御史六

員新書從七品下令史八人監察御史十員新書

正八品上原注貞觀初馬周以布衣進用太宗令於監

察御史裏行自此因置裏行之名龍朔元年

以王本立為監察裏行也計史三十四人令史十八掌固十二人

御史大夫中丞之職掌持邦國刑憲典章以肅正朝

廷中丞為之貳其屬有三院一曰臺院侍御史隸焉二曰殿院殿中侍御史隸焉三曰察

院監察御史隸焉凡天下之人有稱冤而無告者與三司訊

之三司謂御史大夫中書門下也大事奏裁小事專達凡中外百僚之事應彈

劾者御史言於大夫大事則方幅奏彈之小事則署

名而已若有制使覆囚徒則與刑部尚書參擇之凡

國有大禮則乘輅車以為之導朝會則率其屬正百官之班序遲明列於

兩觀監察御史二人押班侍御史專舉不如法者文

武官職事九品以上及二王後朝朔望文武五品以

上及兩省供奉官監察御史員外郎太常博士日參

以上及折衝當番者五日一朝號六參官宏文崇文
館國子監學生四時參凡諸王入朝及以恩追至者
日參九品以上自十月至二月袴褶以朝五品以上
有珂蕃官及四品非清官則否凡朝位以官職事同
者先爵爵同以齒致仕官居上職事與散官勲官合
班則文散官居職事之下武散官次之勲官又次之
官同者異姓為後親王嗣王以下職事者居從其班官
卑者從王品郡王任三品以下職事者居同階品之
上非任文武官者嗣王居太子太保之下郡王次之
國公居三品之下郡公居從三品之下縣公居四品
之下侯居從四品之下伯居五品之下子居從五品
之上男居從五品之下以前官召見者居本品見任
之上以理解者居同品之下以前官召見者居本品見
上下文武三品非職事官者朝參名簿皆稱曰諸公
凡出不踰四面關則不辭見都督參名簿皆稱曰諸
肯於側門左右僕射侍中中書令初拜以表讓中書
門下五品以上及諸司長官謝於正衙復進狀謝於
側門兩班三品以朔望朝就食廊下殿中侍御史二
人為使
泄之

侍御史掌糾舉百僚推鞠獄訟年深者一人判臺事

知公廨雜事次一人知西推一人知東推久次者一人知雜事

謂之雜端殿中監察職掌進名遷改及令史考第臺內事專決亦號臺端次一人知公廨次一人知彈分

京城諸司及諸州為東西次一人知西推贓贖三司受事號副端次一人知東推理區等有糾舉者罰

之以殿中侍御史第一人知東推推御史太倉出納第

二人同知西推蒞左藏出納號四推御史隻日臺院受事隻日殿院受事次侍

御史一人分司東都臺凡有別付推者則按其實

狀以奏若尋常之獄推訖斷於大理凡事非大夫中丞所劾而合彈奏者則具其事為狀大夫中丞押大

事則冠法冠衣朱衣纁裳白紗中單以彈之小事常

服而已凡御史以下遇長官於路去戴下馬長官斂轡止之出入行止殿中以下視以為法先後

有罰入朝則與殿中侍御史隨仗分入東則居侍中
黃門侍郎給事中其次西則居中書令侍郎舍人之
次各居中丞大夫下每一人東嚮承詔五日有旨召
御史不呼名則承詔者出樂彥璋爲大夫以常召兩
御史乃加副承詔一人闕則殿中承詔監察御史分
日直朝堂入自側門非奏事不至殿庭正門無籍天
授中詔側門置籍得至殿庭開元七年又詔隨仗入
閣分左右巡糾察違失左巡知京城內右巡知京城
外盡雍洛二州之境月一代將晦卽巡刑部大理東
西徒坊金吾縣獄蒐捕則監圍察斷絕失禽者其後
以殿中掌左右巡尋以務劇選用京畿縣尉又置御
史裏行使侍御史裏行使殿中裏行使監察裏行使
以未爲正官無員數唐法殿中侍御史遷拜及職事
與侍御史鈞開元初權屬侍御史而殿中兼知庫藏
宮門內事故事御史臺不受訟有訴可聞者畧其姓
名託以風聞其後御史嫉惡者少通狀壅絕十四年
乃定授事御史一人知其日劾狀題告事人姓名其
後宰相以御史權重建議彈奏先白中丞大夫復通
狀中書門下然後得奏自是御史之任輕矣建中元
年以侍御史分掌公解推彈自是御史之任輕矣元

和八年命四推御史受事局而復始罷東西分日之限凡三司理事則與給事

中中書舍人更直直於朝堂受表若三司所按而非

其長官則與刑部郎中員外大理司直評事往訊之

主簿掌印及受事發辰勾檢稽失兼知官厨及黃卷

數臺務主公廨及戶奴婢勲散官之職

殿中侍御史掌殿廷供奉之儀式

京畿諸州兵皆隸焉正班列於閣門

之外糾離班語不肅者

凡冬至元正大朝會則具服升殿

乘馬具服

戴黑豸升殿

若郊祀巡幸則於鹵簿中糾察非違具服從

於旌門視文物有所虧闕則糾之凡兩京城內則分

知左右巡各察其所巡之內有不法之事

一人同知東推監太

倉出納一人同知西推監左藏出納二人為
廊下食使二人分知左右巡三人內供奉

監察御史掌分察巡按郡縣屯田鑄錢獄訟嶺南選

補知太府司農出納監決囚徒與中書舍人金監祭

祀則閱牲牢省器服不敬則劾祭官國忌齋則與殿

寺尚書省有會議亦監其過謬司知朝堂左右廂及百

以判官二人為佐務繁則有支使其一察官人善惡

其二察戶口流散籍帳隱沒賦役不均其三察農桑

不勤倉庫減耗其四察妖猾盜賊不事生業為私蠹

害其五察德行孝悌茂才異等藏器晦迹應時用者

其六察黠吏豪宗兼并縱暴貧弱冤苦不能自凡百

官宴會習射亦如之

年初開元中兼巡傳驛至二十五

大厯十四年兩京以御史一人知館驛號館驛使監

察御史分察尚書省六司由下第一人為始出使亦

然興元元年以第一人察吏部禮部兼監察使第二
人察兵部工部兼館驛使第三人察戶部刑部歲終
議殿最元和中以新官開元十九年以監察御史二
人涖太倉左藏庫三院御史皆初領繁劇外府推事
其後以殿中侍御史上一人為監太倉使第二人為
監左藏庫使凡諸使下三院御史內
供奉其班居正臺監察御史之上

殿中省

原注魏初置殿中監隋初改為殿中局
煬帝改為殿內省武德改為殿中省

殿中監一員從三品

原注魏初置監品第二
梁品第三隋品第四

少監二員

從四品上丞二員從五品上侍御尚醫二員正六品上

主事二人從九品上

令史四人書令史十二人左右仗
千牛各十人亭長掌固各八人

尚食局奉御二員正五品下

原注隋初為典
御又改奉御

直長五人

正七品上食醫八人正九品下

書令史二人書吏五人
主食十二人主膳八百

四十人掌固八人

尚藥局奉御二員正五品下直長四人

新書二人

正七品上侍御醫四人從六品上司醫四人

新書五人

正八

品下醫佐八人

新書十人

正九品下

書令史二人書吏四人直官十人主藥十二人

藥童三十人按摩師四人咒禁師四人合口脂匠四人

尚衣局奉御二員

從五品上直長四人正七品下

書令史三人書吏四人主衣十六人掌固四人

尚舍局奉御二員從五品上直長六人正七品下

書令史三人

人書吏七人掌固十人幕士八十人舊有給使百二十人掌供御湯沐燈燭雜使貞觀中省

尚乘局

奉御二員從五品上直長十人正七品下奉乘十八人

新書無

正九品下進馬六人

新書五人

正七品下

新書上

司庫一

人正九品下司廩二人

新書一人

正九品下

書令史一人書吏十四人

直官二十人習馭五百人掌閑五千尚輦局奉御二員

人獸醫七十人典事五人掌固四人從五品上直長四人新書正七品下尚輦二人正九品

下書令史二人書吏四人掌扇六十人掌輪二十四人掌固四

人人

殿中監掌天子服御總領尚食尚藥尚衣尚舍尚乘

尚輦六局之官屬備其禮物供其職事舊有天藏府

年少監為之貳凡聽朝則率其屬執繖扇以列於左

右凡大祭祀則進大珪鎮珪於墻門之外既事受而

藏之凡行幸則侍奉於仗內驂乘以從百司皆納印

聽焉有行從百司之印左右仗廐左曰奔星右曰內駒兩仗內又有六廐一日左飛二日右飛三日左萬

四曰右萬五曰東南內六曰西南內園圍皆有官馬
坊每歲河隴羣牧進其良者以供御六閑馬以殿中
監及尚乘主之武后萬歲通天元年置仗內六閑一
曰飛龍二曰祥麟三曰鳳苑四曰鸞鸞五曰吉良六
曰六羣亦號六厩以殿中丞檢校仗內閑厩以中官
爲內飛龍使聖厩中置閑厩使以殿中監承恩遇者
爲之分領殿中太僕之事而專掌輿輦牛馬自是宴
遊供奉殿中監皆不豫開元初閑厩馬至萬餘匹駉
馳巨象皆養焉以馳馬隸閑厩而尚乘局名存而已
閑厩使押五坊以供時狩一曰鸞坊二曰鸞坊三曰
鶴坊四曰鷹坊五曰狗坊若元正冬至大朝會則有進爵之禮丞
掌副監事兼勾檢稽失省署抄目主事掌印及知受

事發辰

尚食奉御掌謹其儲供辨名數直長爲之貳若進御
必辨其時禁春肝夏心秋肺冬腎四季之月脾王皆

不可食當進必先嘗正至大朝會饗宴與光祿大夫

疑當作卿

視其品秩之差其賜王公賓客亦如之諸陵月

享則視膳而獻之食醫掌率主食主膳以供其職

尚藥奉御掌合和御藥及診候方脉之事直長爲之

貳凡藥有上中下三品上藥爲君中藥爲臣下藥爲

佐合造之法一君三臣九佐別人五藏分其五味有

湯丸膏散之用診脉有寸關尺之三部醫之大經凡

合和與監視其分劑藥成嘗而進焉

凡藥供御中書門下長官及諸

衛上將軍各一人與監奉御泄之藥成醫佐以上先嘗殿中監次之疏本方具歲月日泄者署奏餌日奉

御先嘗殿中監次之皇太子又次之然後進御太常每季閱送上藥而還其朽腐者左右羽林軍給藥飛

騎萬騎病
者頌焉

侍御醫掌診候調和

司醫醫佐掌
分療衆疾

主藥藥

童主刮削擣筴

尚衣奉御掌衣服詳其制度辨其名數直長爲之貳
凡天子之服冕十有三一大裘冕二衮冕三鷩冕四
毳冕五黼冕六元冕七通天冠八武弁九弁服十介
幘十一白紗帽十二平紗幘十三翼善冠凡天子之
大珪曰珽長尺鎮珪長尺有二寸若有事於郊丘社
稷則出之於內將享至於中璫門則奉鎮珪於監而
進之旣事受而藏之凡大朝會則設案服畢而徹之
尚舍奉御掌殿廷張設湯沐燈燭灑埽之事直長爲

之貳凡行幸預設三部帳幕

原注有古帳大帳次帳小次帳小帳凡五等之

帳爲新
部

其外置排城以爲蔽扞

原注排城連板爲小
城上畫辟邪獸表裏

漆之凡大祭祀有事於郊壇則先設行宮於壇之東南

向隨地之宜將祀三日則設大次於外壝東門之外

道北南向而設坐若有事於明堂太廟則設大次於

東門如郊壇之制凡致齋則設幄於正殿西序及室

內俱東向張於楹下凡元正冬至大朝會則設斧扆

於正殿施蹋席薰爐朔望受朝則施幄於正殿帳裙

頂帶方闊一丈四尺也尚乘奉御掌內外閑廐之馬

辨其麤良而率其習馭直長爲之貳一日左右飛黃

閑二日左右吉良閑三日左右龍媒閑四日左右駒
駉閑五日左右駃騠閑六日左右天苑閑開元時仗
內六閑曰飛龍祥麟鳳苑鵠鵠吉良六羣等號六厩
馬凡秣馬給料以時爲差凡外牧進良馬印以三花
飛風之字而爲志奉乘掌率習馭習馭掌調習掌閑

駕士及秣飼之法司庫掌鞍轡乘具司廩掌橐拈出

納典事掌六
閑芻粟

獸醫掌療馬病

原注初尚乘局掌六閑
馬後置內外閑廐使專

掌御馬開元初以尚乘局隸閑廐使乃省尚
乘其左右六閑及局官並隸閑廐使領之

進馬舊

儀每日尚乘以廐馬八匹分爲左右廂立於正殿側
宮門外候仗下卽散若大陳設卽馬在樂縣之北與

人正六品女史二人
○舊書闕

尚儀之職掌禮儀起居總司籍司樂司賓司贊四司

之官屬司籍掌四部經籍部別為目筆札几案教學則簿

記課司樂掌率樂人習樂陳縣拊擊進退司賓掌賓

客朝見受名宴會賞賜宴會則具品數以授尚司贊

掌朝見宴會贊相會日引客立於殿廷司言宣敕坐

起皆相其儀

尚服二人司寶二人典寶二人掌寶二人女史司衣二

人典衣二人掌衣二人女史司飾二人典飾二人掌飾

二人女史司仗二人典仗二人掌仗二人女史

尚服之職掌供內服用采章之數總司寶司衣司飾

司仗四司之官屬司寶掌瑞寶符契圖籍掌神寶受命寶及符

契皆識其行用記以文簿凡出付皆旬別案記還則朱書注入。車服志太皇太后皇太后皇后璽皆金

為之藏而不用太皇太后皇太后封司衣掌衣服首

令書以官官印皇后以內侍省印飾司飾掌膏沐巾櫛司仗掌羽儀仗衛

尚食二人司膳四人新書典膳四人掌膳四人女史司

醢二人典醢二人掌醢二人女史司藥二人典藥二人

掌藥二人女史司饎二人典饎二人掌饎二人女史

尚食之職掌供膳羞品齊之數總司膳司醢司藥司

饎四司之官屬凡進食先嘗之司膳掌制烹煎和羞

米麵薪炭凡供奉口味皆種別封印典膳掌膳掌調和御食溫涼寒熱以時供進則嘗之司醢掌

酒醴醢飲司藥掌方藥凡藥外進者簿案種別司饎掌給宮人

廩餼飯食薪炭皆有等級受付則旬別案記

尚寢二人司設二人典設二人掌設二人女史四人司輿二

人典輿二人掌輿二人女史二人司苑二人典苑二人掌苑

二人女史二人司燈二人典燈二人掌燈二人女史二人

尚寢之職掌燕寢進御之次序總司設司輿司苑司

燈四司之官屬司設掌帷帳茵席埽灑張設久故者以狀聞

凡汛埽之事典設以下分視司輿掌輿輦織扇羽儀以時暴涼典輿以下分察

司苑掌園苑種植蔬果典苑以下分察果熟進御司燈掌燈燭門閣

燈燭畫漏盡一刻
典燈以下分察

尚功二人司製二人典製二人掌製二人女史二人司珍二

人典珍二人掌珍二人女史六人司綵二人典綵二人掌綵

二人女史二人司計二人典計二人掌計二人女史二人

尚功之職掌女功之程課總司製司珍司綵司計四

司之官屬司製掌衣服裁縫司珍掌寶貨司綵掌繒

錦絲枲之事有賜用則旬別案記司計掌支度衣服飲食薪炭

宮正一人正五品司正二人正六品典正二人正七品

女史四人阿監副監視七品

宮正之職掌戒令糾禁謫罰之事司正典正佐之人官

不供職者司正以牒取
裁小事決罰大事奏聞

內侍省

原注星經有宦者四星在天市垣帝坐之西周官有巷伯寺人之職皆內官也前漢宮官多用

士人後漢始用宦者為官官晉置大長秋卿為後宮官以宦者為之隋為內侍省煬帝改為長秋監武德

改為內侍監

內侍監二人正三品少監二人從四品上

舊書闕從新書增○舊書

從四品上漢魏曰長秋卿梁曰大長秋北齊曰中侍中後周曰司內上士隋曰內侍置二人煬帝曰長秋令正

四品武德復為中侍中官之貴極於此矣若有殊勲懋績則有拜大將軍者仍兼內侍之官德宗置左右神策

威遠等禁兵命中官掌之每軍置中尉一人宦者為之自李輔國魚朝思之後京師兵柄歸於內官號左右軍

中尉將兵於外者謂之觀軍容使而天下軍鎮節度使皆內官一人監之事具宦者傳也○新書天寶十三載

置內侍監改內侍曰少監尋更置內侍

內常侍六人正五品下

原注漢代謂之中常

侍

內給事八人

新書十人

從五品下主事二人從九品下

高品

一千六百九十六人品官白身二千九百三十二人令史八人書令史十六人

內謁者監六人

新書十人

正六品下內謁者十二人從八品下內寺伯二人

新書六人

正七品下寺人六人從七品下

內典引十八人內亭長六人掌固八人

掖庭局令二人從七品下丞三人從八品下宮教博

士二人從九品下監作四人從九品下

令史四人計史二人書令史八人

人典事十人掌固四人

宮闈局令二人從七品下丞二人從八品

下

書令史三人書吏六人內閣史二十人內掌扇十六人內給使無常員掌固四人

奚官局令

二人正八品下丞二人正九品下

書令史三人書吏六人藥童四人典事掌

園各四人

內僕局令二人正八品下丞二人正九品下

書令史二人

人書吏四人駕士二百人執

內府局令二人正八品下

恒烟典事八人掌固八人

書令史二人書吏四人典史六人

丞二人正九品下

事掌固各八人典史六人

內侍之職掌在內侍奉出入宮掖宣傳之事總掖庭

官闈奚官內僕內府五局之官屬

新書并太子內坊爲六局

內常

侍爲之貳凡皇后祭先蠶則相儀后出則爲之夾引

內給事掌判省事

承旨勞問分判省事

凡元正冬至羣臣朝賀

中宮則出入宣傳凡官人衣服費用則具其品秩計

其多少春秋二時宣送中書內謁者監掌內宣傳

掌儀

法宣奏承敕令及外命婦名帳

凡諸親命婦朝會所司籍其人數送

內侍省

命婦下車則導至朝堂奏聞

內謁者掌諸親命婦朝集班

位

分涖諸門

內寺伯掌糾察諸不法之事歲大儺則監其

出入

寺人掌皇后出入執御刀冗從內典引掌諸親命婦朝參出入導引

掖庭令掌宮禁女工之事凡宮人名籍司其除附公

桑養蠶會其課業

婦人以罪配沒工縫巧者隸之無技能者隸司農諸管作須女功者

取於戶婢丞掌判局事博士掌教習宮人書算衆藝監作

掌監當雜作

宮闈令掌侍奉宮闈出入管鑰凡大享太廟帥其屬

詣於室出皇后神主置於輿而登座焉既事納之凡

宮人無官品者稱內給使若有官及經解免應敘選

者得令長上其小給使學生五十人皆總其名籍以

給其糧廩丞掌判局事內給事掌諸門進物出納之

麻

內閣史掌承傳諸門出納
管鑰內掌扇掌中宮繖扇

奚官令掌奚隸工役宮官品命丞爲之貳凡宮人有

疾病則供其醫藥死亡則供其衣服各視其品命仍

於隨近寺觀爲之修福雖無品亦如之

陪陵而葬者
將作給匠戶

衛士營冢三品葬給百人四品八十人五品六十人
六品七十人八品九品七人無品者斂以松棺五
釘葬以轎車給三人皆
監門校尉直長泄之凡內命婦五品已上亡無親

戚於墓側三年內取同姓中男一人以時主祭無同

姓則所司春秋以少牢祭之

內僕令掌中宮車乘出入導引丞爲之貳凡中宮有

出出則令居左丞居右而夾引之凡皇后之車有六

事在輿服也

駕士掌習馭車輿雜畜

內府令掌中藏寶貨給納名數

及供燈燭湯沐張設

丞爲之貳

凡朝會五品已上賜絹帛金銀器於殿廷者並供之
諸將有功并蕃酋辭還亦如之

唐書卷第六十六